



NOVEMBER 2024

VOLUME 64 | NO. 11

# Khristian Thukizakna



Makaitufe Kipumkhatna

**EDITORIAL BOARD**

**Editor**

Rev. Dr. S. Vung Minthang

**Managing Editor**

Rev. Thawndoulian

**Contributing Editors**

Rev. K. Kamchinkhup

Rev. Nenglian Vualnam

**Production Managers**

Rev. V. Thangkhanmuan

Upa T. Paukhansiam

Mr. Mangthianlal Samte

**Circulation Manager**

Upa K. Jamchinthang

**Design & Setting**

Upa Khuplajem Guite

**LAKMAN:**

Kum khat ₹ 150.00

Dak ah ₹ 200.00

Bu khat ₹ 15.00

**CONTENTS**

1. EDITORIAL	: 01
2. MAKAITUTE' KIPUMKhatNA	: 03
3. SAPTUAM KEMTUTE KIPUMKhatNA	: 06
4. TUAILAI LEH NEKTAKZONNA	: 12
5. TATE ETKOLNA LAMPANG	: 16
6. BIBLE STUDY	: 18
7. GAMMIAL AW	: 24
8. DORCAS CORNER	: 30
9. MUSIC CORNER	: 32
10. THU TUAMTUAM	: 33
11. EBC INNSUNG THU	: 35
12. ORDAIN SUNNA	: 36
13. KIPAHTHU GENNA LEH THUMNA DINGTE	: 39

**Thusuah ding piakna:**

Editor,  
Khristian Thukizakna  
Dorcass Hall, P. O. Box - 6,  
New Lamka,  
Manipur - 795006, India.

*Thusuah sung-a kigente  
Evangelical Baptist Convention  
Saptuam ngaihndan a hikim kholkei.  
Thusuahte'n amau thusuah ah moh a  
pawtek ding uh.*

## MAKAITUTE KIPUMKhatna

*Unaute it lam ah ittak in kilainattuah chiat un; pahtawi lam ah, kideihsaktuah chiat un (Rom 12:10).*

**K**hovel khang tangthute i et leh lalgamte puk zel in lalgam thak Khong ding zel hi. Lalgam khenkhatte sawt deuh daih pawl om uh a, akhente tomchik sung lel daih pawl leng om hi. Tuamah bang in inkuan leng nam leh gam a ding a mithupi taktak sekkhe thei om a, hileleng huchi gige om ngeilou phial hi. Kuamah theih ngeilouh inkuan apan mi thupi petpet a piang khesak inkuan bang leng om thei hi. Tukha a i et nop bel bang a i chih chiang a lalgam, pawlpi leh inkuante dingkhia a bang achih chiang a puksia ahi uhiam chih ahi. Ngaihdan khat ah Pathian khut a om ahi. Ama'n a utte ding khesak, a utte puksak ahi, chih theih abang hi. Ahia, Bible i et chiangin huchi hilou in apukte leng aziak om a ading khete leng aziak kichian tak om hi. Hiai thuguk Bible ah en zual leng:



*Khatna ah*, Buaina kipatna mipite hilou in makaite akipan ahi zaw sek hi. Gam khat, khosung khat nasan ah leng kituahlouhna a om chiang in mipite a kipan hilou in makai lungsim senei khat leh nih mipite thuzoh (instigate) ana om teitei sek hi. Huai makai khat leh nihte'n thuhoihlou a thehzak chiang un mipite lungbuai sak in gulau sak masa uhi. Hun tamtak ah mipite hong buai chiang un huai a makai thusia bawlte koilam hiam ah ana om khinkhian uhi, etsakna din Rome khopi katna thu bang ah, alangtanga mipi makai den pawl leng om thei veve zel hi.

Kumpipa David Israelte kumpipa ahong hi a, kong bangkim a khantouhna thupitak hong om hi. Tua hunlaiin David cabinet sung ah mi muanhuai pipi tamtak aom ua, tuate lakah Ahithophel a pil tungtuang hi. 'Ahithophel ngaihdan dongkhate tuh Pathian ngaihdan dongkha bang hial in a kingaihsun uhi' chiin Bible in agen hi (2Sam 16:23). Himahleh hun hongpaizel ah David tapa Absalom in apa kumpi hihna laksak sawmin helna ahon bawl leh Ahithophel in David taisan in Absalom lamah a va pang maimah hi (2Sam 15:31). Absalom leh Ahithophel kikal a bang teng thu om

ahi hiam chih tuh Israel lalgam siatna ah kilangkha hi. Absalom in apa David tung a thil sia ahih tengteng Ahithophel lemgelpih tampi om ding a gintak ahi. Huaiziakin buaina kipatna makaite sung ahinuam mahmah chi ihi.

*Nihna ah*, Buaina makaite sung (kikal) a hong kipan ahi ichih laiin bangziaka makai sung buaisek hiam chih isui khiak keileh makaite migilou vek sak khak ding lahuuai hi. David leh Ahithophel kikal buaina hong kipatna suisau zek lai leng. Bible I muhdan in David in a khelhpih Bathsheba “Eliam tanu...Hit mi Uriah zi ahi (2 Sam 11:3). Misiamte gendan in Bathsheba pen Ahithophel tunu (a tapa tanu) ahi chih ahi. Hiai thil poi mahmah David in ahih ziakin Ahithophel in David siatna ding khoih hun lemtang zong den hiding in Bible siamte’n agingta uhi. Tuin I thupi ah kiknawn leng makaite kikala buaina piangsaktu sek bangdang hilou in khelhna ahi chih kimu hi.

I houlimna a i muhdan in buaina kipatna makaite apan ahi sek hi. Mipi laka buainate bel makaite sai ding sa mah ahi. Makai sung a buaina a om chiangin a thu omdan theiloute awlawl in amau buaina ah a pilut sek uhi. Huchia mipi hon pehlohsak chiang un mipi buaina a hong suak hi (2 Sam 13:29,30). Makaite tuh mipite hihbuaitu ding hilou a mipite buaina haksatna hihvengsaktu dingte ahi uhi. Mipite buaima a makaite sung ahong buai chiangin huai pawlpi tuh buaizak manoh ahimai hi. Huaiziakin, thubuai labuai aom chiangin heutu level a sukvek pah pah kism hi. Makaite kal kisia mipite’n lep sawm chih pen mangthang dekte chiamtehna himai ahi. Huaiziakin, tualsung level hiin, division level, hiam HQ level ah leng makai kichite’n denchiang a pawlpi adia hoihlou thei ding a om leh kitheihmoh bawl loua saifel pahpah ding ahi. Thil hoihlou kitheihmohbawl chih pen a venna ding hilou in hoihtakin hon susia hen chihna toh akibat ton omthei ahi. Hiai igen pen saptuam sung kia hilou in inam leh igam a dingin leng sinlai lakna dingin poimoh isa hi. Makai ihihngal leh buainate mipite lak atunma a hihveng thei leader hih hihchiat sawm ding ahi. Huaiziakin, Pathian in honpiak mohpuakna (mission) tangtunna dingin makaite kipumkhatna apoimoh dan kigenuanglua zoulou ding hi. ■

## MAKAITUTE' KIPUMKHATNA (Ephesate 4:3)

- Rev Thang Johnson, DS. EBC Mizoram Division

**T**HUMASA: Kipumkhatna chih in Pathian leh mihingte kal a kipumkhat nawna thu a hon ngaihtuah sak hi. Eden khelhna ziaka kikhen, lau leh zum taka omte, hehpihtu Pathian in a tapa Jesu kross a tatna sisan ginna ziaka kimelmakna banglai hihchim a, ei nihte kipumkhat nawn a Pathian tawh ahon kilemsak a, kimelmakna abeisak ziaak a Kipumkhatna ompen tak i gen ut hi. Hiai Jesu ginna ziaak lel in ahi launa leh zumna omlou a, Kha kibang a Pathian kiang lut theihna ineih tuaktuak ta uhi. (Eph.2:14,16,18). Hiai Jesu ginna ziaak a Khasiangthou a chiamteh, khamuan, leh sungten aom in atate/goluah dingte ihita uhi. Nidang lain nam himhim ihikei ua, tuin zaw Pathian namte ihong hita ua; a thangpaihna ta apiangte a zahngaihna mute ihong hita uhi. (1Pet.2.10). Eden a kitenna sunzom in Pastor in thuchiam a lutpih in nupa pumkhat din a hon gawm zel hi. Tua bang in Pathian in mikhialte leng Kross a hong si Jesu Khrist ginna tungtawn a ngaidamna thukun a hon lut pih in, ahon kipumkhat sakta hi. I tatekna ua zahngai in, ikhelhnate a thei gige nawnta kei ahi. (Hebrute 8:12). Hiai ngei tuh ana hi Jesu tungtawn a kipumkhatna bul.

**MAKAITU:** Pathian saptuamte kem leh vaak dia sapna tang, thaunilh makaitute lungsim ah ahong om hi. Hon samtu Pathian ahi a, Jesu Khrist itna tungtawn a sap a om in ilungtang ua a Kha siangthou theihpihte ihi uhi. Min tungnung pen, hon hondam thei min dang omlouh lai a, Amin gingtate Pathian tate hon suaksak JESU kia ahi (Jn

1:12). Kuapeuh Toupa min lou tuh hotdam in a om ding hi (Rom 10:13). Jesu sisan a atatsate, asapkhiat mikigawm saptuamte khalam a makaihtute leh khamangthang khelhna sal a tangte Jesu musak/theisak dia nasem makaitute khawng lungsim a om makaitu ahi. Tangtawn hinna lampi kawkmuh a, tua lampi a honpi thei, khalam

sihna-natna apan tangtawn-hinna hon kawkmuh thei makai ipomawh uhi. Makaitu chitna poimawh pen tuh Jesu nei, it, leh enton a ahihna hinkhua a midangte laktu ahi.

**MAKITUTE' KIPUMKHATNA:** Makaitute kipumkhatna tuh hatna, khanna leh lawhchinna dia poimawh ahi. Jesu' anungzuite kipumkhatna din athum hi. Makaitu in amah telpa etton ding nei a, a makaih ding dan Laisiangthou a thupiak omsa nei ahi chih a mangngilh louh ding ahi. Mihing ituam dung juiin deihdan, hoihsak dan, utdan, siamdan, phur dan leh lemtheihdan kibang vek chih om lou ding ahi. Himahleh Pathian nasep dan leh 'hongpai un ngaihtuahkhawm dih ve ni' chitu principle/strategy omsa ahi. Nupa hihna leng Pathian min lou a dansiangthou a kitengte kituah gige theih hilou a, kitheih siamtuahna leh kingaihdam tuahna, hehna nitumpih saklou dia Kha kithunun sakna lou in thil baihlam hilou ahi. Makaitute kipumkhatna leng tua bang thou ahi. Pathian Kha in athuneihkhum makaitu tuh

midangte tawh kipumkhat thei ding hi.

**MAKAITUTE KIPUMKHATNA DALTU (melma):** Lucifer/Setan abul apan Pathian tawh i kipumkhatna ding daltu om ahi. Tuni tan in leng dai deksuai nailou ahi. Ama hihna leh panlakdan-

1. Kisaktheihna (pride)- Ei, ii, chihte sanga ka, kei chihna lungput ahi (Isai 14:13) Pukna ma ah kisaktheihna apai ahi (Pau 16:18). Na kisaktheih leh puk ding tuh na maban ahi. Dinmun a lungkim louhna tuh Lusifer nou khat hihna ahi.

2. Hazatna (jealousy)- Mihingte ipianpih ahi. kihilh leh kizil ngaiselou a isiam sa uh ahi. Jesu leng nungjui hauzaw chihziak a haza ua, sihsak teitei atum uh ahikei maw? (Mat.27:18). Herod in ama thakheng ding Kumpi Jesu ahazat ziak in naupang tampin sihlawh uhi (Mat.2:16). Midangte khawng haza nahi kha zenhoh hia?

3. Deihsaktuam neihna (partiality)- Theihlou kal in tanaupai, behpai leh deihsaktuam neih khak theih ahi. Hiai in kipumkhatna

tun lou in khasiatna meima damthei lou apawn omsak gige thei hi. Khentuam/deihsaktuam nei a min ahon theih ding uh kivengthei makai tuh kipumkhatna kemit thei mipiching ahi.

4. **Kampau kha**(bitterness): LST in lei tuh neu mah leh khoizual hak mahmah achi. Lungtang a dimval kamin agen chih bang in i kampau/thugen zawng a ihihna kilang zel ahihziak in kisel haksapi ahi. I kampau ten kipumkhatna ding dal theih gige zia in pilvan huai ahi. A gentun lah thei nawn lou, azaten lah mangngilh haksa sa mahmah thei uh ahi. I kampau a kipumkhatna kepbit sawm ding ahi.

**MAKAITUTE KIPUMKhatNA OMTHEIH NANG:** Jesu Lungsim bang lungsim neihna tuh kipumkhatna dia poimawh pen ahi. Mikhial hih kiphawk a, kisik taktak a Jesu sangte tuh ama aa ahihtak zia un, a itta ua, adeihte dei in, ahuate hua in, athu mang dia kipiakna lungsim apu tei gun uhi. Kipumkhatna om theihna din-

1. **KINGAIHNIAMNA** tuh makaitute kipumkhatna dia akhuampi ahi. Pathian tawh

kikim a omtuh thil khiaklah ding in asepe kei a, mihing in a hong piang hi. Eiten khiaklah ihau lua uh. Hau mahleh eite zia a hong genthei tuh imakai Jesu omdan ahi (2Kor 8:9). A dai dide akam aka kei a, diktat taka ngaihtuahpa kiang aki pelut zaw ahi. Toupa Jesu dung sun in, kingainiam lungtang neih i sawmchiat ding ahi.

2. **KITEI-AWNG** (kimansak): Itna zia a hong kimansak Tou Jesu ahi. Makaitute lengtuabang a kimansak/kitei awng theih gige ding tuh kipumkhatna dia poimawh ahi.

Nasep ding in beini nei ngeilou ding ahi. Huchi lak apan a Toupa zat dia kimansakte ahi Toupa mizat theih. Akiman gige makai tu hih itum chiat ding uh.

3. **SIKHA BANGA KIBAWL:** Nasepsak a omding in ahong pai kei a, mitampi tatna dia ahinna pe dia hong pai ahi zaw ahi(Mat.20:28). Kiliansak makai, duat deuh ngiat, minpha zawng leh aneizoute pibawl makaitu hihkhak ding tuh Pathian sikha kichite adin kivel huai mahmah ding ahi. Sikha lungput neih tuh Jesu hihna koppihna ahi.

4. *SIH TANA THUMANG* makai izuih Jesu ahi. Sacrifice eilam a senna, supna, kiamna omlou a, punna metna lawkna ding lam kia en, a abaihlam lam kia zong a haksa thuak ngaplou a, thumanna lungput neilou makaitu aomtheih man in pilvan mahmah ding ahi. Tua bangte alem chiing lel tanghou pung delh ahi nuam uh.

5. *NGAIHDAMNA*: Pathian in Khrist a hon ngaihdam tak bang a kingaidam tuah dingte ihi. Ngaihdam chih in mangngilh chihna ahi pah kei a, hehna leh ihinkhua a gen neisaklou a omtheihna

ahi. Hehna paigige mite zaw Jesu'n angaidam siang naikei a ahimai ding e. Ngaihdamna hikhua nuam na zangkha ngei hia? Makai hi in akailoute'n leng hiai ngaihdamna hinkhua neih poimawh law ve hang aw.

**THUKHUPNA:** Jesu nungzui ama dung sun a, a sisan a aleisa saptuamte kem, ching vaak ding leh amangte zawng a, apuukte phawng a, aliamte tuamdama, khalaman thutak a vak pichingtu makai kipumkhatna omsaktu hithei din simtute TOUPA'N hon vualzawl hen! ■

## SAPTUAM KEMTUTE KIPUMKHATNA

- Rev. T Thangzasiem, DS. EBC Thanlon Division

**THUMAPI:** Tukum-2024 thupi khennenna kha thum paisa a te I etkik leh, July kha in “*Khosung kipumkhatna*,” August in “*Namsung kipumkhatna*,” chih ahia. September in “*Veng leh pam toh kipumkhatna*” chihte hoih kholdiak a bang hi. Tu mahmah aleng zatpah mahmah dia poimoh ngen ahi vek uhi. Ahia theih dinga poimoh tuh mimal khat kia kipumkhat chih a om theikei a, i kipumkhat pih dingte a utkei ua leh thil hithei lou ahi chih theih masak poimoh hi. Tulai khovel ah kidouna pung deuhdeuh mahleh, lemna thugen ding a tawm deuhdeuh hi. Russia leh Ukraine kidouna ah lemna khut zakding a omkei a, tulai diakin hong nasa semsem ding bang hi. Israel leh Hamas kal ah leng lemna thugen ding omlou ahih manin kidoupi-IIIna ah hon heilut thei ahichih misiamte pattauhna ahi. Burma gam in tuni tan



buaina a tuak ua lemna palai ding om tuanlou zel hi. Tu lellel a i galdou (Meitei gal) uah leng centre government kiang a I thupai zohlouh dantel uh khasiat huai vungvung sak in om hi. Eisung i en nawn alah hichi ki himai chihlouh gending om tuanlou hi. Hiaibang khovela i omlaiin Toupa saptuamte kipumkhatna dettak nei a i om theihna uh lametna om sun ahi diam kachi ahi. Huaiziakin saptuam kemtute kipumkhatna toh kisai kikum khawmleng ut huai i sa hi:

**JESU NUNGUITE HUN A KIPUMKHATNA:** Toupa Jesu hunlai in muhtheih saptuam kichi om naikei mahleh nungzui om sunten kipumkhat haksa a sa petmah uhi. Jesun a nuam leh haksa a aki zuihpah leh thillamding hih mit a mukhate ngen himahleuh a kipumkhat theikei uhi. Toupa Jesun a paikhiak san sunglel inleng a lak uah kinialna piang in *“I lak uah kua a thupipen dia? chih thu in a nakisel uhi (Luka 9;46)”* chih kimu hi. Alak ua lianpen leh thuneipen hih ding tuh a ki nialna *“topic”* uhi ahiah ziakin. Nungzui theizette adingin a Khristian huaikei a anungzui vaikei lawdeuh mahmah sakin om hi. Tunin dinmun hoihzaw a om utna, seppihte sanga vouzaw leh sangzaw hiam ut luat naten kipumkhatna suse nak mahmah ahichih i theiding uh. Mathai gelh ah Zebedai tapate nu’n Jesu Khrist kiangah. *“Hiai*

*ka tapa nihte (Jakob leh Johan) na taklam ah khat, na veilam ah khat a tuttheihna dingun thupia in” (Matt 20: 21)* achi hi. A tate midang sangin dinmun hoihzaw leh vou zaw ah tu le uh chih deih ahi.

Himahleh *“Nungzui dangten huai a zaktak chiangun unau nihte tungah a hehta uh” (Matt 20; 24)* achia. Hiai in a sung uah kipumkhatna susia ahi chih kimu thei hi. Korin saptuamte tanchin bang, Galatia a i sin uh Mosi dan zuih leh zuihlouh ziak a buai gending atam mahmah hi. Huan Jerusalem saptuamte buaina tuamtumte kigen kim zoulou hi. Huchi ahihlai in Nasepte laibu ah *“Huan, a gingta mipite lungsim munkhat leh ngaihtuah munkhatin a om ua: a lak ua khatin leng a sumneih, keia tuam ahi, a chi kei; thil tengteng a kikop zo jel uhi.” (Nas 4;32, 36-37)* chih ahiah manin kipumkhat theih

hun leng nei uh ahi chih kimu hi. Hiai Kipumkhatna support nuamlou Anania leh Saphira te nupa in asih loh hialdan uh leng kimu thei hi (Nas 5;1-11). Hiai a i gen tam louten tulai i saptuam kipumkhat diamdiam dante khawng nuam leh manpha ahidhan hon muchian sak semsem hi.

**SAPTUAM MASATE HUN A KIPUMKHATNA:** Jesu hun abei chiangin muhtheih saptuam ding kheta hi, hiai hun a kipan Khasiangthou leng piak ahita uh. Himahleh Saptuam makaite lakah kipumkhatna om thei tuanlou ahidhan *Church history* ah kimu hi. Jesu Khrist mahmah sinsakna zapha loute hun hongtun chiangin, ngaihndan kibatlouhna tam semsem hi. Thugin toh kisai in “*Trinity*” thu ah abuaipah ua, AD 590 a Pope Gregory in “Misite kha direct a van a paipah ahi” chih agenkhiak akipan inleng kinalna (*debate*) naktak piangsak hi. Huchiin saptuam in “*Inquisition*” dan abawl ua, huai tuh khawmpi pomlough thildang pom peuhmahte gawt theihna dan ahi. Hiai dan nuaiah khami zaw kisa kichiten mi tampi manin, mulkim huaitak a

khailup leh hallup tanpha nei hial uhi. Tuatte lakah John Husste, Wycliffte leh Saptuam masa a heutu tampite telkha uhi. Saptuam kemtu masate hun in gindan leh pomdan kibatlouh ziaak a mi thah tuh siang bang khop in ngaihsun kha uhi.

Kum 1530 velin Protestant saptuam piangkhe mahleh doctrine toh kisai ah kipumkhatna a om tuankei hi. Martin Lutherte, John Calvinte, Zwingli leh heutu dangte lakah kinalna omtou den hi. Sacrament tungtang ah a buai ua, sehkhohh toh kisai ah a buai ua, naupang baptisma tungtang ah leng a kipumkhat theikei uhi. Huchiin Saptuam masaten kum 4 sungkia in mi 78 nohsuah (*ex-communicated*) in, midang 58 val hinna laksak uh kichi hi. Hun hong paizel in “*Renaissance*” huai tuh theihna a khanlohna hunbi hongtun chiangin, nidang a diklou achihte uh dik sakna, dik achihte uh diklou ahidhan theihthakna in saptuam masate lungsim hon khek in tuni dinmun ki tungta hi. Laisiangthoua i muh bangin Jesu hunlai hiin anunglam hitaleh, saptuam masate lakah

kipumkhatna in mun a luahzou kei chih a kimuh manin poi petmah sakin om hi.

### **SAPTUAM KEMTUTE KIPUMKHATNA DING IN:**

Toupa Saptuam kemtuten kipumkhat sem theihna point tamlou genlai leng uthuai isa hi. Huaiziakin saptuam kemtute kipumkhat sem theihna dinga poimoh point thum kia i enkhawm ding uh:

#### **(i). Kingaihniamna leh**

**migitna:** Paul in Ephesa saptuamte kiang ah *“Kingaihniamna leh migitna tengtengin...lemna Kha a kipumkhatna vom chinten dingin. (Ephe 4;1-3)”* achi hi. Sepkhawm diamdiam theihna dinga poimoh masapen tuh *“Kingaihniamna leh migitna”* ahi. Kingaihniamna hoih kisa chiat mahleh a kingainiam ding zawsam ki omlou hi. Saptuam kemtute ngial tuh midang sanga kingainiam zaw dinga lamette ki hi kholdiak hi. Nungzuiten *“I lak uah kua a thupi pen dia?” (Luka 9;46)* chih a buaipih lai un. Jesun hiai naupang banga kingainiam tuh nalak uah athupi pen ding achi khum hi. Mikhat in hichiin hon gen a, I nam

in hiai sanga haksa zawsem thuak theilai hiin ka kimu honchi mawk hi! Bangziak in eita thumthum ngal hanga ka chihleh. Aman *“Mite hotel houlimnate ka ngaikhia a, kua mahmah a kisik hiam, hihkhial kisa hiam, kingainiam hiam a om kei uh. Amau gup lamchiat ah apanggiu-geu vek uh. Kumpi Pharo a kingaihniamna mateng gawtna haksa zaw semsem a maituah sak bangding i hi uh”* achi leh. Adik kei ding ka chi ngam tuankei hi. Huai in hon sinsak nop tuh kingaihniamna leh migitna a ki bulphuh kipumkhatna i poimoh mahmah uh chih ahi.

#### **(ii). Itna a kibulphuh kipumkhatna:**

Itna tellou in ngaihdamna a omkei ding chih tuh thudik ahi. I lak uah itna leh kingaihniamna nei himhim a ki om nawn kei hi. Dik kisa ngen, pil kisa ngen, hoih kisa ngen om khawmte lakah kipumkhatna om ngeilou dingmah ahi. Paul in Korinte kiangah *“Mihing paute leh angel paute-in thugen mahleing, itna ka neih keileh, dak ging lel hiam, dakkhutbet ging lel hiam ka hi ding hi (1 Kor 13;1)”* achi hi. Saptuam a dinmun poimoh tak lenkawm a itna neilou

hiam, khotang leh nam makai hi kawmkawm a gamgi nei itna leh khentuam nei itna lel toh ki limzial ihihkhak ding pilvan huai hi. Tuabang mite tuh Paul in dak khut bet ging lel toh kibang achihte ahi uh. Khatan sang taktak thugen theihna, thil lamdang hih theihna, thuguk tengteng theihtheihna nei lengle itna ka neihkei leh bangmah ka hi kei” (1 Kor 13; 2-3)” achi hi. Khrist apan suak itna ah kingaihniamna a tel a, huai in ngaihdamna leh kipumkhatna agah khezel hi. Khalam thilpiak dangdang tengin bei hun nei mahleuh “*Itna jaw chikchiang mahin a bei kei ding*” (1 Kor 13;8) achih manin, kipumkhatna dia kalbi poimoh lianpen tuh itna ahi.

**(iii). Kaina lampi zuihlouh ding:** Juda laikhak ah “*A tung uh agik hi! Kaina lampi a jui ua...*” (Juda 1;11) achia. Kaina lampi tuh “thikna, huatna, hazatna leh tualthahna” lampi ahi. Kaina in a nau a thik ziakin avua a, a volum hil-hial hi. Hiai Kaina lampi ah i tai duamduam uh hilou maw! I nam sung leh society sungah kithikna leh kihuatna level a sang petmah chih i haihkei uhi. I thil etdan leh paipih

dan himhimte uh a kichim zakgawpta a, bang chileh i ki lamthak (*build up*) thei nawnding ua chih lungkham huaipi ahi. Michih in eimah ngaihdan leh hoihsak dan kia a thu in hiam, a lim(photo) in hiam, a video hiam in media tungtawn in i post theihta ua, mi kuapeuh publisher hiam, editor leh writer i hi theivekta uhi. Himahleh tem hiamtak tawi toh kibang i hih man un a zatdan siamlouh ziakin siat leng i siatpih petmah uhi. Saptuam sungah leng hiai Kaina lampi zuilou i kisak lailaiin saupi zuikhin i hihkhak ding pilvan huai sak in om hi. Sawltak Paul hunlai tuh Phillipi saptuamte hat vanglai tak ahia, himahleh midang khat leh khat a ki haza tuah uhi. Huaiziak ahi ngeiding Paul in “*Mi chihin amah sangin midang hoihsa zaw hen* (Phi 2;3) achihna ziak chih hon ngaihtuah sak hi.

Thikna leh hazatna in a kua kua hon khami sak theita kei a, Office a seppihte toh kal tanpha naktak in a suliam thei hi. Mahni pastor pihte leh upat pihte leng phat utlouhna leh thikna lungsim in hon luahtdim vekta abang hi. Baptispa Johan tuh Jesu malam a semtu

ahia, a vanglai in amah banga jawlnei thupi a omkei hi. Himahleh aman anung a hong paiding pa tuh pahtawi in *“Ka nungah kei sanga thupijaw a hong lel ahi; kun a a khedap khau phel tak leng ka hi kei (Marka 1;7)”* achih khawng zak nuam mahmah hi. Huchiin Jesu’n leng *“Numei suan lakah Baptispa Johan sanga thupi zaw a piang ngei kei... (Matt 11;11)”* chiin kipahtawi tuah uhi. Hiai tuh Saptuam kemtute lungput ding a kilawm ahi. Mahni ordained pihte toh kal ah Kaina lampi a zuihhak theih a, mahni pastor pihte leh committee member pihte toh kal ah leng Kaina lampi a zuihhak theih hi. Khat leh khat kipahtawi dan siamin ka nunga hongpai dingpa maw keisang a khami zaw leh thum mi zaw ahi. Kei sanga inkuan ki thunun zaw ahi uh. Tuabang heutu in hon enkolta ding ahih ziakin na hampaha uh ahi chih thute kinawtsiat theichiat leng Pathian khasiangthou in hong sem zawsem ding hi.

**THUKHITNA:** Saptuam kichi pawng tam leh pawng hat hehu hoihthou sam mahleh, a poimoh zaw tuh Khrist a kipumkhatna ahi. Jesun ahun

nanunga a veipen midang hilou in a nungzuite ahidaih uhi. Amaute paisan pahding ka hi chih a ki thei a, a lungput uh leh a mizia uh theichian lua ahih manin a om dingdan uh ngaingam lou in thumsak hi. *“Kei jaw khovel ah ka omta kei ding, hiaite (nungzuite) bel khovel ah a om ding uh; kei na kiangah ka hongpai dehta. Pa Siangthou aw, nang kei non piakte na minin hum in, pumkhat a hih theihna ding un (Johan 17;11)”* chiin thum hi. Nungzuite kia adinga thum louin tunung zel a gingtu om touzel lai dingte ading in leng thum hi *“Hiai khawngte ading kia a ngetsak ka hi kei, a thugen ziakua kei hon gingta lai dingte a dingin leng ka nget sak ahi; a vek ua pumkhat a hihna ding un (Johan 17;20)”* chia, nang leh kei a ding a leng thum ahi. Tuniin saptuam kemtute kivel thak poimoh mahmah hi. Jawlnei Elisha te khawng asih nung, hankhuk a aguh vuak in a sukhhak misi natawrm hing nawn hialkhop a Pathian mizat ahi (2 Kum 13;20). Ei pawl bel i ki sukhhak pih peuhmah lung kimlou uh, i ki saikhak pih leh i kigolh khakna committee peuhmah

lah sehnih kisuah geihgeih hiam, midangte nuaksak theiphet khong ihihkhak ding pilvan huai hi.

Huai hunlai a Jesu lungsim a lianpen hi dia gintak tuh salam sang mah in, khalam kipumkhatna mahmah hizaw ding hi. Etsakna dingin Tonsing leh tonsing hihziak hiam, Ngaihte leh ngaihte hihziak hiam, Naulak leh naulak hihziak hiam lel a kipumkhat i hihleh, Saptuam neitu Jesu Khrist tupdan ahikei chih i phawkding uh ahi. Aman na kipumkhat uleh *“Nang kei non sawl chih khovel in a taksan theihna dingin (Johan 17;21, Johan 13;34-35)”* achih manin. Makaite

kipumkhatna tuh tangthupha puanzakna poimoh tak leng ahi. Ephesa saptuamte tuh Asia minor a saptuam sagihte lak a phattham ching khop a hoih ahi uh. Sawltak lian Jesu Khrist laikhak dawng masapen leng ahi uh. Huan saptuam ginom chih kia hilou in kuhkal leh hangsan a chiamteh ahi uhi (Kil 2: 1-5). Tuabang khopa hoihte kipumkhat dinga sinsak akul lailai uh thil lamdang tak ahi. Tunia saptuam kemtute leng ngaihtuah leh lungput kibang lou, duh leh deih kibanglou ngenta a minpu lel a om khawmte hilou dingin. *“Lemna Kha a kipumkhatna vom chinten dingin (Ephe 4;3).”* Toupan hon vualjawl chiat hen. Amen ■

## TUAILAI LEH NEKTAKZONNA

- Pastor G Khankham

**I. TUAILAI:** Tuailai i chihte tuh-Naungek ana hi ngeita, naupang chih leng ana pelta, ahilhanga upa nailou, ham nailou tek nailoute ahi. Mihing a dia hun nuam pen-Naupangten tun kal a ngaklah uh, pitek, putekten ngai mahmah a agen chim theihlauh hun uh ahi. Hiai hun tuh i vanglai, i lutlai leh i hoih pen hun ahi. Theihshiam i sawm ding i kidawm ding kisathei mai lou in Toupa i lau ding uhi.

Hiai hun in hondeih, hon zang nuam leh hon mu nuam a tam. Kumpi nasem ding tuailaite

kideih, mimal nasem ding tuailaite kideih, Politicianten amau a dia pang dia hondeih

uhi. I melmapa Setan in ama sepaih muanhuai hi ding a hon zol, i biak Pathian hon bawltun ana sem ding a hondeih, hon khoiliantu i nu leh paten tapa hoih tanu hoih leh suanhuai hi ding a hondeih uh, mi nu leh paten makpa ding leh mou ding a hon deih, i khua leh tui, i chi i nam in tunung chianga makai, heutu hi ding a hon deih. I mohpuakna a lian, i poimohna a gol, mawk om maimai thei ihi kei. Tuailai hun a fel leh kizente mah ahi a pichin chiang ua leng mi zattheihte. Nanga om thilpiak na siamna, na kivakna, na hih theihte amanpha pen a zang ding in inkuan in hon poimoh, khosung, chi leh nam in hon poimoh ahi.

**II. NEKTAK ZONNA:** Hiai tuh tomchik a gen in nnasep chi leng i gen khelh a gin huaikiei. I Laisiangthou ah “Nna sem mi pen nek mutak hi ahi” (Mat.10:10 I Kor 9:9). Tua banah, “Kuapeuh in nna a sep nop kei leh nek zong ne kei hen” (II Thess.3:10). Hiaite apan nektak zon tuh nnasep ahi chih a lang chiang mah mah hi. Toupa Pathian in Adam kiangah nek ding thu a pe masa kei a, sep ding a guan masa zaw. Toupa Pathian in pasal api a, Eden

huan ah a kem ding leh a veng dingin a koih ta hi. Huan, Toupa Pathian in pasal kiang ah, huan a sing chiteng gahte na utut na ne thei hi” (Gen.2:15-16). Huan kem ding leh veng ding chih Toupan a hilkhith in huan a sing chiteng gah na utut na ne thei chiin phalna a pe pan hi. Adam in Eden huan a pawtsan dek in hichibang Toupa thupiak a hong om nawn- “Toupa Pathian in amah a lakkhiakna leilet ding in Eden huan a kipan a sawlkheta hi” (Gen.3:23). Tun zaw mikhial na hi a kon hehpih a semlou in ne in achi tuankei a khauh zaw, ahaksa zaw sem ding a sawlkhia kin a om. Pathian in Adam kiangah “na ji thu na man a singkhat agah na ne ding ahikei chi a ka hon thupiak, agah na nek ziak in, leitung nang zia kin hamsiatin a om ta hi; na dam sungteng in gimtak a sem in agah na ne ta ding” (Gen.3:18) chi hi. Hiai tuh tunitan a mihingte nektak zonna dia Adam tungtawn a Toupa thukhun itan khak uh ahi den ta hi. Na tuamtuam, Sep dan tuamtuam om mahleh nek leh dawn a kingakna ding taktak zaw ut dan chiang kia a hunkei a, gimtaka semtute mah in lohchinna atang sek uh ahi.

Nektak zonna na khatpeuh a nuamlua omkei, ahaksa lua leng a om samkei, lungtanga tupna, kipiakna, kuhkalna, chihhtakna toh thanuamtaka sep in hon lohchingsak ding hi. Mi a peuh nuam dinga lamet ding ahikei. Nang apen, nang sep pen limbawl inla, huai ah na theihtawp suah in pang lechin nektham, kingakna takin Toupan hon bawlsak thei hi. Buh haute a hatpente ahi tuankei uh- taimataka nitenga kuan, azu aham thuaka, mi in om ni, mi kuanlough ni a leng kuhkaltaka semte ahi zaw. Nektakzonna ichih a huap alian a, zontheihna leng atam a eikhawng theihbatlough tampi a om lai ding. Nektakzonna chi tampi om mahleh ei septheih leh ei toh kituak banah Khristiante adia leng kilawmte mah telsiam thei leng. Nekzonna chi tampite lak a tamlou enkhawm leng:

**1. KHUT NASEP:** Hiai tuh mitam zaw thamte nekzonna, pilna siamna nei loute adinga, baihlam pen ahi. Hiai leng a gol mahmah a septheih atam in gen ding atam ding, tuate laka tamlou- Loubawl, huan bawl, Mistiri/Carpentry nasep, siksek, workshop, sammet, puankhui, puan-gat, khauphan, suanggalh,

nangphan leh adangdang. Khawpi ah sep ding atam sem a, summuhna leng abaihlam zaw khota sang in, a rate omsa pawl om mahleh a semtuten amau hoihsak banga bawl tawmtheih leng a tam.

**2. SUMSIN & SUMBUKBAWL:** Sum sintheihna chi tampi om in, a sepdan zong atuamtuan om hi. Van zuak, van leh van khentuah a pung om a mi leitawisak chih bang. Hauhsak i ut leh sum sin a sum bawl ding ahi. Ahihang in, pilvanna ding bel i nasep leh i sum zon sawm dan ah kivel hoih masak ahoih. Mi khitui luanna, mi inkuan subuaitu leh mi hinkhua susetu hihlough tum thei leng. Pathian leh Saptuan banah khotang deihlough thilte a sumsinlough tuh ahoih pen.

**3. MIMAL NASEM A KILOHNA:** Mi hausaten na ahau ua, semtu tampipi a poimoh uh. Company leh Industry lianpipi neite ngial in mi tamsem poimoh uhi. Laisiamte sep ding, a siamloute sep ding tampi anei uhi. Tulai laisiam mahmah leh akiva deuhthe Government tangkha lou in Company ten tang pahpah uhi. Amau loh hoihtak bawlsak ban uah



hamphatna tampi pe theilai uhi. Tuatan va tangpha teilou eilawimi naudon bang, mi puansawp bang, mi in zut leh inngak bang, mi school a sem bang leh nitha a va kiloh bang ihi uhi. Mihausate pansan a, khosa, amau leng ei a zong kiloh tawmte ziaka na tampi semthei, aki poimoh tuah ihi. Pu neite ipu deihna banga i om a, amau deih banga isep ding tuh i mohpuak ahi.

**4. MISSION NASEP:** Saptuam teng in semtu a nei chiat, hunbit a sem pawl, casual a sempawl chih bang om hi. Mission nasepna ah achi tuamtuum tampi in kikhenthei hi. Mission field a missionary a sempawl, saptuam omsa kem a Pastor na sempawl, sawltak nasep bang, sinsaktu na leh office a clerk leh a tuamtuum sempawl. Tuailai ten i septheih ding uh na tampi om hi. Recruitment Rule (RR) in a ngiat bang siamna leh chinna i neih nak leh kipat khiak sawm in panla ni!

**5. KUMPI NASEP:** Kumpi nasep, hiai tuh miten ingaihsang uh, ilunggulh leh i duhthusam pen uh ahi. Ana atam a semtu ding leng poimawh atam. Siamna sang leh apilte ading, siamna sang

neiloute ading leng atam. Himahleh na muh ding pen ahaksa ta, ana sang a a zongtu atam zawk gige ziakin. Siam tuamdeuh leh siam bik bang nei deuh leng a baihlam deuh ding. Tuailaite ading in kumpi nasep ding tam mahmah ahihman in, eilama kisin dingte panlak dingte ah theihtawpsuahin pan nala peuhmah leng.

**THUKHITNA:** Denchianga inkuan bawl ding, zi leh pasal, ta leh nau nei leng banga vak a, bang a nektak zong ding chih ki sakkholh hun tuh tuailai hun ahi. Tuhun a kisakholsiamte nupi-papi, inkuan a hon bawl ua leng buailou dingte ahi uh. Sepna neikei mahleng sep ding tumta khat tup a neih, laipilna ineihkei leh leng thanuam in taima peuhleng kivaklah lou ding ihi. Mi taima, zu leh sa leh khamtheih hihlou, Pathian laudansiam mite Toupan vualjawl zel hi. “Ngaidih, Toupa mit tuh amah laudansiamte tung ah atu gige a, a chitna lamente tung ah; A hinna uh sihna laka humbit ding leh kialtana amau tung hing ding in” (Sam 33:18-19) A misiangthoute aw Toupa laudansiam un, amah laudan siamte adingin taksapna himhim a omlouh jiakin (Sam 34:9). ■

## TATE ETKOLNA LAMPANG

- Upa Chinsum, Asst. Secretary, TBUC EBCC Delhi

**E**BCC Delhi, TOUPA pidan a thupi hi. Etdan leh gendan tuamtuam om theih lai in, tutung in tate etkolna lampang pansan in saulou enkhawm le'ng i chi hi.

**A. 13 Oct 2001** Biakinn basement ah, KNP (tuchia'n BCD chih hita) Sinsaktute leh Nu-le-pate paikhawm in Seminar neih ahi. Tua hun ah, Pu V Dongzathang' ji, Nu Pari in amah thiltuhsate pansan in Naupangte Etkolna lam gen in sinsakna pia hi. Bible thu pasan: Marka 12:30, A gen chiamtehhuai khenkhat: Tate tai (scold) sang in pahtak in thu a mang thei zaw uh. Gum tak leh khauh tak a etkol sang in, nu-le-pate'n i tate panpih (parental support) pe thei le'ng lawhching zaw ding hi. Damtheihna ding in, nek hoih leh taksa kisawizoinate zom (next) a poimawh ihmud kham ahi, a chi uh. Innkuan kikhop neihpih teitei ding. Sunday Skul kai sak teitei ding. Tate na i sep sak Chiang a, "Na nu hiam na pa hiam huh aw" chih louh di. Amau na mah ahi chih latsak di, "Na nu hiam na pa hiam in hon makaih thei in te," chih zawk di.

**B. 30 Oct 2016** Nipini biakna kikhop ah, Pastor Letlal Haokip, The Journey Church in, "Khristian Innkuan a Tate Kepdan (Christian Parenting)" chih thupi pansan in thutak ankuang luina nei. Thugen manpha ei.

**C. 07 Sept 2019** Grace For All Ministry (GFAM) vaisaina in, Khristian Innkuan a Tate Kepdan (Khangsawnte Nutsiat Nei Di'n) chih thupi zang in Seminar neih ahi. Sinsaktu: Rev Dr Kh Khaizakham.

**D. 14 Sept 2024** Tualsung saptuam in 11-13 Nov 2023 sung, Caleb Institute, Gurugram ah Teenage Camp sai hi. Tua ah naupang 180 lak giaklut. TOUPA Kha nasepna hunpi zang, Rev L Kamzawang, leh naupang sinsaktute' tungtawn in tung. TOUPA hoih lua hi.

Camp bawhzuina (follow up) hunzek, tukum bul apan BCD sinsaktute'n kha teng a hun khat zel a paitouhpih lai un (naupangte ngimbik); Uplate'n le Camp bawhzuina (nu-le-pate ngimbik) hunzek khat neih di thukim in year plan ah guang uh. Sinsaktu di'a dawp, Bro. Anand Pillai, MD, Leadership Matters Inc. hong lemthei. A lunglut vive mi 100 vel paikhawm in na zang manpha ung.

**NIHNA:** Laisiamna lam a Computer science graduate, MBA (Marketing & Strategy) zou, corporate world a kum 42 seemta, Bro Anand Pillai in hinkhua kipumkhek a Hindu sahkua apan Khristian a k'ong lut tung lai (1979?) ka group leader-pa un, Commentary zat louh di. Bible na sim chiang un a Bible mah, version 3 bek tawh kipan unla, meditate un a chih ka phattuampih lua hi, chi. A LST thu suutdan leh points organize dan thupi sa a, Bible lam sinna degree laak chih bang na nei hiam, chih kidong a dawnna ah (kiphatna tellou, mawlkha in dawng): Bible Seminary ah vasin beh di om lua in ka thei

kei. Mimal mahmah a Bible sim leh a' Thu ngaihtuah zom ah thil teng kim, muhsuah beh di om toutou hizaw in ka thei. Thil khat hon gen le'ng - Dallas Theological Seminary a Nehemiah laibu sui & sutnounel ziaka Ph.D. degree ngah khat in Nehemiah laibu pansan a kei mimal' note bawlte en in, "Kei suisuah Bible thute sang in nang note bawl ah Bible thuthukte kim/kiching zaw ei, a hon chi..." chita zen hi!

**THUMNA:** Manipur buaina tawh kisai, Delhi chiang a om heutute sep theih leh sep tuak na sak bang a om, chih kidong a dawnna ah: News report himhim awnna lam nei (*bias*) ahi. Tua ziak in, news report ah kinga kei un. Thutak (LST Thu) leh Thudik awnna lam neilou (facts & figures) mah pibawl unla, lemna leh kituahna mah delh tawntung un chi hi. "*Nang aa ka hi e kumkhua adi'n, Ka siamna pilna zongte Pa aw Nang aa ahi...*" chi in kipanthatk chiat ni. Simtute, tua bang - Thutak leh Thudik pibawl - hi chiat di'n TOUPA'N, zawhna tawh hong ompih hen! ■

# BIBLE STUDY



**Pastor Khamkhanchin Ngaihte**, Local Pastor, EBCC Zion

**Text : Ephesate 4:17-32**

**Thupi : KHRIST A HINNA THAK TAWH KITUAK NITENG HINKHUA**

**T**humasa: Paul in Korin saptuamte kiang ah, “...kuapeuh Khrist a a om chiang in, thilsiamthak ahita. Thilluite a beita a, ngai un, a thak hongsuakta uhi,” (2 Kor 5:17) chiin ana gen hi. Mihing lui leh mihing thak hong kigawm in thilthak dang hong suak hilou in, a lui pen a thak in kheng khia chihna ahi. Hiai a a thak hongsuak gingu hinkhua ding tukha a I sin ding (Eph 4:17-32) ahi. Thilsiamthak hihna tawh kituak a hindan thak a hin ding tuh gingu tute mawhpauk ahi. Tukha in Bibles International pen ka hon zang hi.

**Bung 4:17-19. Mihing lui**  ngiat” chihleh “Toupa ah” chih thumal te’n hundang a ngetna

**Tang 17:** *“Tua ahihman in, Toupa ah hiai gen in ko’n ngiat hi: Zentel dangte, a phatuamlou a lungsim ngaihsutna utawh a nuntak bang ua noute na nuntak nawnlouh ding uh ahi.”*

**HILHCHETNA:** Ephesa saptuam te Jesu Khrist ginna tungtawn a mihingthak (thilsiamthak) hong suakta uh ahihman in, nidang lai hinkhua koikhia a, hindan thak a hingding in Paul in ngen hi. “I insist” kichi Bible thak ah “ka hon theisak” aki chi a, BI a “ko’n ngiat” chih pen in genkha zaw ding hi. “Ko’n

lehtawh” chihleh “Toupa ah” chih thumal te’n hundang a ngetna leh hanthawwna tangpi te sang a ngaihkawk zawk ding ahihna taklang hi. Zentel Pathian phawklou te, Jesu Khrist ginna ziak a Pathian’ ta hong suak uh ahihman un, a hindan ua a kikhek ding uh, tua hindan kikhekna ziak a Pathian theilou namdangte lak a ‘a chi tuam’ (different) ahih ding uh ahi. “A phatuamlou ngaihtuahna” kichi in Pathian lauhna tellou hinkhua mawkna, gen bei, tup leh ngim neilou ahihna genna ahi. Tuabang hinkhua pen nusia a, taisan ding in Paul in ngiat hi.

**Tang 18.** *“Amaute zaw a lungtang uh a khauh man in, theihtheihna a nei nawn kei uh a, Pathian’ hinna apan pawsiah ahi uh a, a theihtheihna uh a mial hi.”*

HILHCHETNA: Hiai ah Paul in, Zentel ginglou mite’ hinkhua, Ephesa a gingtute hinkhua masa, hon gen hi. “Lungtang khauh” chih in Pathian thei na pi a, a mau deihtelna a Pathian bang a belou (cf. Rom 1:21), a thilhihte gingta nuamlou, huaiziak a, khelhna le khelhna bang a ngai nawnlou, sia leh pha thei khen nawnlou lungsim genna a zat ahi. Pathian thei napi a Pathian bang a biak ding nial uh ahi. Huaiziak a, Pathian, hinna tengteng bulpi, apan khenkhiak a om, khalam a a si (2:5) ahi uhi. Pathian kihta ngaihsutna in Pathian kihta hinkhua suang hi.

**Tang 19.** *“A maute’n phamawhsakna a nei nawn kei uh a, huaiham tak a asianglou hih ding in numei pasal kal paktatna ah aki pumpiak uhi.”*

HILHCHETNA: Tang 18na a lungtang khauh leh theihtheihna mial gah tang 19na ah hong ki gen a, tua tuh, poisakna bei (immoral)

hinkhua ahi. English (NIV) ah, “Having lost all sensitivity, they have given themselves over to sensuality so as to indulge in every kind of impurity, with a continual lust for more,” achi. “Ginglou ahihlai ua a hinkhua utuh “poisakna bei” hinkhua ahi chiin Paul in a gen. Pathian lam a a lungtang uh khauh ziak a Pathian tawh kizopna neilou in, huaiziak mah in a hinkhua uh amau sa utna suk puchinna ding lel in zang uhi. Numei pasal kal a gangi neilou a amau sa utna bang a zalentak a gamtang ding a amau leh amau ki pekhia uh ahi chi ahi. Amau mah panlakna, amau mah deihtelna a hiai bang hinkhua zang uh ahi chih na ahi. Hiai bang hinkhua ah, Ephesa a gingtute, tuma lam a gingloumi ahih lai un, ana kizang uh ahi chiin Paul in a gen a, huai ziak a, hiai bang hinkhua tawpsan vengveng ding in hasuan hi.

**Bung 4: 20-24: Khrist a Mihing Thak**

**Tang 20-21.** *“Noute’n zaw Khrist na theihdan uh tuabang ahi kei hi. Jesu a thutak om bangbang in, ama’thu na zata uh a, amah ah sinsak na hita uhi.”*

HILCHETNA: “Nou te’n zaw” chih zang a Paul in a gentup, ginglou mite hinkhua leh ngaihtuahna dan tawh gingtute hinkhua leh ngaihtuahna dan kibatlouhna ahi. Ephesa a gingtute’n, Jesu Khrist tawh mimal a kizopna tungtawn in, Khrist sinsakna tawh kituak hihna leh hindan thak nei uh ahi chih Paul in phawksak thak hi. A thu a thei hilel nawnlou in, mimal a kizopna tungtawn a Khrist theihna in hinkhua khek a, Khrist sinsakna tawh kituak a hing ding a hanthawn ahi. Jesu Khrist kia thuak ahi a (Johan 14:6), thuitak mah a sinsak a, khemhatna (deceitfulness) ichihamah ah omlou hi. Huaiziak a, Ephesa gingtu te’n Jesu Khrist tawpsan a, thuzuau leh amau nopsakna bang lel hinkhua a zat Chiang ua thutak nungngat san uh hizaw ahi chih Paul in gen hi.

**Tang 22-24.** *“Nidang lai in, lunggulhna khemhatna in hon hihsiat bangbang in na nungta uhi. Tu’n bel, sinsak a na om bang un, na nuntakna masa uh, na mihinglui uh suahkhia unla, na khalam lungsim put uh thaksak in om unla, diktatna leh siangthouna diktak a Pathian*

*batpiah a simthak, tua mihing thak pen silh un.”*

HILCHETNA: Paul in Khrist a mihing thak hinkhua bangchi bang hi hiam chih genchetna hon nei hi. A mihing lui hinkhua uh pitu leh thununtu thupipen tuh Khrist hilou in, amau lunggulhna, amau utna mah ahi achi. Huaiziak in, Khrist a mihingthak a hong hihchiang un tua hindan lui pen a suahkhia ua, a paihkhia uh poimawh ahi. Ahitak in, a kisikna uh niteng hinkhua a hindan kikhekna tungtawn a langsak ding a ngetna ahi. Pianthakna hun a thilsiamthak ihihna in hindan thak hon ngiat ahi. “Na khalam lungsim put uh thaksak in om un,” chih ah siamthak ahihna uh khalam lungsim put ahi a, a siamthak tu bel Khasiangthou ahi. Khalam lungsim put a siamthak ahihna un niteng hinkhua a “suahkhia ding” leh “silh ding” (imperatives) ah api ahi.

“Suahkhia un” (put off) leh “silh un” (put on) chihte thu mal poimawh mahmah ahi uh. I niteng hinkhua a I puansilhite I koihkhia a, a dang (a thak) I silh zel genna thumal ahi.

Pianthakna ziak a I hihna leh dinmun kikhekna bel khatvei a setdet ahi. Himahleh, hiai hihna leh dinmun kikhekna in niteng a akituahpih hinkhua a kikhekna a hon tut ding ahi.

### **Bung 4:25-29. Mihing Thak Niteng Hinkhua**

Tang 25-29. *Tua ahihman in, noute tek in zuautheihna suahkhia unla, na veng na pamte uh kiang ah thutak gen un. Ahang bel, eite khat leh khat kihiangtuah tek ihi uhi.* <sup>26</sup>*Na thangpaih chiang un khial kei unla, na thangpaihna uh ni tumpih sak kei un.* <sup>27</sup>*Dawimangpa zong mun awn nawn kei un.* <sup>28</sup>*Guta in gu nawnkei henla, a tasam mi kiang a piakding a neihna ding in, za khut a nahoih sem in gim zaw hen.* <sup>29</sup>*Na kam uah thusia him him pawtsak kei unla, a zate ading a hehpihna a hihtheihna ding in, kilamtouhna ding a kul thuhoih pawtsak zaw un.*

**HILHCHETNA:** Hiai ah Paul in mihing thak hinkhua in midangte tawh ikal a hetkhak ding ahihdan gen hi. Ephesa a gingtute leng, Khrist a thilsiamthak hita uh ahihman un, hindan lui nusia a, a kiim akiang ua midangte te tawh

akal a tua hindan thak a zatkhiaak ding uh ahi chiin hilh hi. Midangte hetkhalou Khristian hinkhua om theilou hi. Piangthak ihihna I kiim ikiang a mi te'n ahon phawkpih ngeingei ding uh ahi.

Gingtute Khrist a hihna thak (new identity) in hindan thak (new life) hon suang ahih dan, zopkhawmna in Paul in "tua ahihman in" chih tawh hiai tang hon pan hi. Tang 25-29 sung ah thupiak pian in hihlouhding leh hihding hunkhop hon taklang hi. Hiaite hinkho lui leh hinkho thak kibatlouhna ahi pah uhi.

**Tang 25** ah, *zuautheihna suahkhia a, thutak gen ding* chih ahi. Gingtute khatpeuh zuautheihna khelhna a puk theih ahi. Himahleh, zuautheihna pen chiindan (habitual) a nei ihihleh thilsiamthak ihihna in bulbal neilou ahi ding, a ziak tuh, Setan zuau tengteng kipatna leh a bulpi ahih ziak in (Johan 8:44). Paul in, gingtute thutak gen ding a ahasuan lai in, thutak gen chiindan a nei, niteng hinkhua a zat ding a hasuan (present tense with imperative) ahi.

Khatvei a zawhte hilou ahi. Zuaugen tawpsan a, thutak kihilhtuana ding mun tuh khotang hinkhua leh mimal mal kal ah ahi. “Zuautheihna” ichih zuau genna kia hilou in, thu khat pepeuh a kan a val a genna (exaggeration) genna leng ahi.

**Tang 26 ah,** *heh unla, khial kei un* (BSI) chih ahi. Hehna/Thangpaihna kichi a lauhuai dan gen nuam ahi. Hehding a hon sawl hilou in, leitung a I om sung in hehna bel om thei tham ahi. Ahihhang in, gamgi neilou a thangpaihna/thunun zawhlouh ding zen a hehna pen melma vanzat a suah pahpah man a, pilvan ding ahi. Thutak gen pen chiindan a neih ding ahihlai in, hehna pen chiindan a neihding hilou ahi. Thilhoihlou ziak a hehna bel ahiding mah ahi, ahihhang in, thununlouh hehna ichih saltanna khat suak thei hi. Thununlouh ahichiang in a ziak dik mahmah a hehna leng khelhna tuntu hithei ahi. Tuabang a en hehna thunun lou a, hehna in ei ahon thunun chiang in, I hinkhua a setan intek, mun pia I suak hi. Pilvang ni.

**Tang 28 ah,** *guktakna tawpsan a, panpihna nasep sep ding* ahi (from stealing to sharing). Guklounh ding tuh thupiak 10te lak a khat ahi (Eks 20:15). Rome 13:9 ah leng a gen a, Korinte kiang ah leng, guta te'n Pathian' lalgam luahlou ding uh ahi achi (1 Kor 6:10). Guktakna chi tuamtuam a om a, huaite teng tuh lungtang a kipan ahi. Mi thugen I zak sawn, ei aa dan a mundang a gensawn ichih bang, midang lai gelh ei gelh dan dan ana gelhsawn (plagiarism) chihte guktakna chikhat ahi. Mi neihsa laksuh/guksak sang a a tasam mite huh ding I Laisiangthou sinsakna ahi. Mahni khut a nasem a, a tasam te huh a, panpih ding in Paul in gingtute hasuan hi.

**Tang 29 ah,** *thusia genlouh ding, thuhoih gen zawk ding* chih ahi. “Na kam uah thu sia him him pawtsak kei un” chih a “thusia” (*sapros*)kichi paubul lam ah thilmuat-theigah, sing, sa/ngasa muat (rotten) genna thumal ahi. Thil muat in a hoihte tanpha lawhsawn a muatsak ahimbang in, thusia in leng midangte tawh kizopna sesak hi. Thusia ichih khelhna gah ahi (cf. Gen 3:12; Rome 3:13-14; Matt 12:35). Huaiziak in, nna



hoih sep ding (t28) kia hilou in, kampau chidam zat ding tuh gingtute hindan ahih ding ahi. Thuhoih (wholesome words) ichih a za mite bawloih a, lamtou thei thute genna ahi. I kam apan pawt thumal tamzaw te tuabang thute ahi uhia?

**Bung 4:30-32: Kingaihdam tuah chiat ding**


Tang 30-32. *“Tuachiang in Pathian’ Kha Siangthou lungkhamsak kei un. Tatna ni ading a Pathian in tua Kha Siangthou a hon chiamteh ahi. <sup>31</sup>Khaatna, thangpaihna, hehna, kinakna, leh kigensiatna khempeuh, a sia kideihsakna khempeuh tawh suahkhia un. <sup>32</sup>Pathian in Khrist a noute hon ngaihdam taak bang in, noute zong lungnemna tawh siam kituh tek unla, kingaidam tuah tek un.”*

**HILHCHETNA:** Thusia in mihing leh mihing kizopna sesak kia hilou in, I sung a teng Kha Siangthou lungkhamsak ahih man in ngaihkawk mahmah ding ahi. I pianthak hun in Pathian in A Kha Siangthou in ata hiding in hon chiamteh (sealed) hi. Huchiin, Kha siangthou in hon luah in hon tenkhum hi. Isai 63:9-10

ah Israel te gamdai khualzinna ah Pathian in ompih den mahleh a tung ah hel in Kha Siangthou lungkhamsak (grief) uhi. Ginna a Israel Thukhun Thak gingtute’n leng tuabang khelhna a puklut theihluat ahi. Pilvang ni.

**Tang 31** ah, Kha Siangthou a chiamteh ihihna ziaak a I hinkhua apaihkhiaak, koihmang, leh taisan ding te ahon taklang hi. Huaite tuh- Khaatna (bitterness), thangpaihna leh hehna (rage and anger), kinakna leh kigensiatna (brawling and slandering) leh a sia kideihsakna khempeuh (every form of malice) te ahi uh. “Khaatna”(bitterness) ichih Greek thumal *pikros* apan kila *pikria* ahi a, zum (pointed), hiam (sharp), kha vilvel, thuk vilvel (pungent smell) etc genna ahi. Damdawi hiam thil khatak I nek a, a khaat vilvelna in I pumpi hon zelsuak hial bang te genna ahi. Piangthakte hinkhua ah hiai bangte a omlouh ding, paihkhiaak vek ding ahi. I lungtang omdan zon olna (index) tuh I kampau (speech) ahi.

**Tang 32** ah, *Khrist in hon ngaihdam bang a kingaihdam*

*tuah ding* chih ahi (cf. Kol 3:12-13). Kihepihtuahna leh kilainattuahna ichihte kingaihdam tuahna ding kong hongtute ahi uhi. Gingtute niteng hinkhua a hiai chitna/hoihna (virtues) te akilat gige ding ahi. Gingtute lak a kingaihdamtuahna ding san bulpi (basis) tuh Pathian in Khrist a ahon ngaihdamna ahi (cf. Matt 18:21-35). Ngaidam ding a ngaihdamna tang ihi chih theih gige ding ahi. Midang ngaihdam ding hasa I sakuat leh Pathian ngaihdamna I tan I velthak poimawh ding hi. Ngaihdamnah au gingu hih  gingu sawm chiat ding uh.

**CONCLUSION:** Jesu Khrist hondampa a i san toh kiton in i hihna leh dinmun a kikhek a, Pathian' ta hihna Kha Siangthou pansan in piak ihi (Johan 1:12). Huaiziak in, dinmun lui hinkhua I nutsiat a, dinmun thak in ahon ngiat hinna thak a I hin a poimawh hi. Hiai kikhekna pen lungtang a kikhekna ahi a, huaimah tuh niteng gamtat khohei a hong ki latkhiak ding ahi. Niteng a Jesu Khrist batna lam a pichin lam manawh a khang ding a kikhekna ahi. Tuabang gingu hiding in Toupa'n hon vualzawl hen. ■



## Gammial Aw

*Mangthang ding i hihlai a eite hon zongkhia a tangtawn hinna hon pia, i Toupa leh Hondampa Jesu Khrist min in Gammial Aw simtute tengteng itna chibai aw. Saptuam in Pathian mission i sepa tuni Chiangchiang a i kalsuannate thawnlou a malam nawt in i paithei zel hi. Field mun a semtute leh gingtute kipiakzohnate ban ah thilpiak leh thumna a chihtaktak a na pangzel saptuam mite ziak a field tungtawn a A Lalgam kekletna ding a i nasepa tungtawn a gingthak, baptisna tangthak leh lam tuamtuum a vualzawl na i muhzelte ziak in kipahhuai i sa mahmah hi. Tangthupha genna ding a hunhoih bangtan neilai ding i diam chih i thei kei a, huaiziak in, A misiangthoute'n hunhoih i neihlai a Khrist Lalgam kekletna ding a tamthei bang pen sem a kalsuan ding a naakpitak a kisuuk a panding ahihdan hon musak hi. Saptuam mite'n thilpiak leh*

*thumna a field a kalsuan semtute leh field a ding a i na thumpih zelte thawnlou ahildan hiai anuai a bang in enkhawm nawn ni.*

## **A. HIMALAYAN MISSIONS FIELD**

### **KIPATHU GENNA LEH THUMNA DINGTE:**

1. Toupa'n i thumnate hon dawng in, semtute kalsuanna tungtawn in gingthak 19 hon piaknawnte ziak in kipahtu gen ni. Jesu Khrist Lal leh hondampa ding a sang mi 19-te khalam kalsuanna ding ah Khasiangthou makaihna leh pina ngetpih ni. Khateng a semtute kalsuannate ban ah i thumna leh thilpiakte thawnlou ahildan i mu a, Toupa'n khateng a muh theih ding gah tampi hon piakzelte ziak in kipahtu gen ni.
2. Semtute'n chidam leh buaina om lou a Pathian gamna sepna ah tuni chiang dong kalsuan zel thei ahihman un kipahtu gen ni. Semtute'n field a ginglounite a houlimpihna tungtawn ua Pathian thu ngainuam a lunglut omte'n houlimpih ahihna tungtawn ua Pathian hing hon muh theihna ding un thumpih ni.
3. Sikkim Missions Field in "The First Sikkim Missions Field Conference -2024" chih minvuah in khawmpi October 12-13, 2024 sung Jorethang mun ah nuam leh manphatak in zangzou uhi. Khawmpi hun in mi 85 vel paikhawm thei ahihman un manpha i sa hi. Pathian in hiai khawmpi tungtawn a thu leh la kigente hon zatsak a, tunung a field a ding a khalam leh salam a khantouhna muh ahih theihna ding in thumna toh delhzui poimoh i sa hi.
4. NEBC sung a tuailaite a ding in 'Music leh Worship Training' October 21 – 25, 2024 sung Field Office Birtamod mun ah neih in om hi. Hiai hun in sinsaktu in Mr Thangbiaklal Valte, Music Promoter, EBC pang hi. Hiai hun a tuailaite'n a sinkhiak bangbangte uh field a manphatak a hon zatkiak theihna ding un thumna a delhzui ding in i ki ngen hi.
5. Rev Dr Thangminlun Mangte, Field Superintendent, Mongolia Khopi Ulaanbaathar a MD2 Seminar' ah September 27-29, 2024 sung chidamtak in va kihel thei hi. Khawmpi nuam leh manphatak a zangzou in, dam leh bittak a field tungkiknawnta ahihman in kipahtu gen ni.

6. Tuktui luangte ziak in September 27 & 28, 2024 in Nepal ah vuah tamtak a zuk ziak in menchim tam mahmah hi. Hiai menchimte'n i Saptuam Biakin leh semtu khenkhat inn, banah gingtute inn bangzah hiam hihse mahleh, kuamah hinna taan zen omlou ahihman in kipahthu gen ni. Menchim ziak a siatna tuak saptuam mite'n hihsiat a om a tenna innte uh hoihtak a hon tunding ua khosak hon patnawn theihna ding un thumpih ni.
7. Nepal singtang lam ah vuahtui tam ziak a menchim in Evan Uttam Rai inn leh a gamsung uh hihse dimdem hi. Innsung vanzat bangmah lakkhiak man neilou ua, menchim in a inn uh tuahmang hi. A silh-le-te'n teng lel utoh suakta ahihman un, Pathian in a taksap uh leh poimoh bukim uh a hunhun a hon piaksakna ding in thumna in delhzui ni. Ban ah, Sangratar, Memeng leh Imsuwa a i Biakin banah Tunibote a Licentiate Pastor Manoj leh Licentiate Pastor Prakash Rai te tenna inn Imsuwa ah leng menchim in a hihkhak ziak in lauhuai dinmun a om ahihman in thumpih ni.
8. Menchim ziaka sukkhak a om Memeng Biakin zattheih ding dinmun ah om nawnlou ahihman in, Pathian in biakin hoihtak tungding nawn thei ding a saptuamte a ompihna ding in thummite'n thumpih ni.
9. Semtute leh gingtute Toupa Khasiangthou kepna toh mailam nawt a khawvel buaina lakah khamangthangte itna leh veina toh naksem a pang a hong kalsuan theihna ding un thumpih ni.

## **B. DHEMAJI MISSIONS FIELD**

### **KIPAHTHU GENNA LEH THUMNA DINGTE:**

1. Toupa'n field a semtute kalsuanna tuni chiangchiang ah daltu omlou a a hunhun a gah muh ding baptisna tang leh gingthak hon piakzelte ziak in kipahthu gen ni. Maban a hihbuaite bangmah omlou a Field a semtute'n Toupa ompihna toh chidamtak a sep-le-bawl a neihte uh hon sutzop zel theihna ding un thumpih ni.
2. Thumtute thumna gah leh semtute kalsuanna tungtawn in Mr Higa Regon leh Innkuante'n September 29, 2024 in baptisna

tang uh kipahthu gen ni. Khrist a ding a theihpihtu muanhuai hong hih theihna ding un thumpih ni.

3. EBCC Namgharia Study Centre a naupangte lak ah mi thum Biakin kai gige thei ua thupi i sa mahmah a, i kalsuannate thawnlou ahihdan muh theih a omte ziak in i kipak mahmah hi. Biakinn kai gige thei naupang thumte lak ah naupang khat kiang ah semtute'n Bible pethei ahihman un kipahhuai i sa mahmah hi. Naupangte'n piak a om Laisiangthou thute a hon sim ua, Pathian hing hon muh theihna ding un thumpih ni.
4. Gingtu Mr Tarun Mili, Mr Dimbeswar Doley, leh Mrs Somp Pangging-te biakna kikhop hunte ah kihelzou nawnlou uhi. Biakna hunte a kihelzou nawnlou a om himahle uh a ginna uh kiptak a hon dinkippih paisuak zohna ding un thumpih ni.
5. EBCC Bongalmari ah gingtu muanhuai Mrs Noyonti Taw, atapa leh a mounu damlounhna ziak a Hindu a lutkik tuni tan damlam manoh lou in omlai hi. Hiai damlounhna ahihleh a innkuanpihte'n Hindu a aom vek louh ziak ua hiai bang tuak ahih dan uleh a Nu pen in Biakin kikhop a tawpsan louh ziak a ngoh ahihman un thumpih poimoh mahmah hi.
6. Silapathar a om Mr Kumar Doley in a zi leh tate gingtu ahih ding uh daltu in pang hi. Innsung a Pa pen in a zi leh tate gingtu ahih ding uh dal a pan la himahleh amah ngei in leng Jesu Khrist a hondampa ahihdan a hon muhna ding in thumpih ni.
7. EBCC Dunaguri a om gingtu Jyoti Charah in numei lam damlounhna a neih, Pathian apan hihdamna a ngah theihna ding in thumpih ni.
8. EBC Dhemaji Mission Field a Gospel Camping masapen hi ding in September 3-6, 2024 sung Kareng Chapori mun ah manpha leh lohchingtak a zatzoh in om hi. Huai hun in Papi 30 te'n Pathian mai a ki latkhiak thakna neitheih ahihman un manpha i sa hi. Camp tungtawn a Pathian houpihna tang a Jesu Lal leh hondampa dia sang thei bang, Khristian hihnung a leng ana bah gawpta (nungtolh) hunkhop Pathian mai ah hong kilanthak thei uhi. Khristian hilou Mr Bengal Doley kichi leng hiai camp ah kihel a thugen a ngaihkhiaik tungtawn in Jesu a

Lal leh hondampa dia sang in gingu hong suak a, September 08, 2024 in baptisna piak in om hi.

9. Field in October 9-12, 2024 sung Eco Camp, Kareng Chapori mun ah Youth Gospel Camp nuam leh manphatak in zangzou uhi. Camp hun sung in “Run to Win” I Kor 9:24 chih thupi pansan in semtute mah thugentu a pang in, thu-le-la a kitaitehna banah taksa lam a kisukhalhna tuamtuam leng semtute vaisaina nuai ah neih a om thei ahihman in manpha i sa hi.
10. November 10, 2024 chiang in, Dhemaji Missions Field Khawmpi neih in om dinga, thugentu in Rev G Thangsanglian, Field Co-ordinator, Assam Missions Field pang ding hi. Khawmpi manpha leh lohching ahihna ding in thumna in phawk ni.

### C. HOJAI MISSIONS FIELD

KIPAHTHU GENNA LEH THUMNA DINGTE:

1. Lanka Station pansan a semtute'n kothak Salamkhun kichi khua a lut in, huai ah hun dang a lawmbawlna a neihzel bang un lawmbawlna pantheita uhi. Kipahthu gen in, Toupa gamna sepna ding a a gammite toh kichimat tak a omna ding a lawmbawlna poimoh masa ahihman in semtute taksap a hunhun a Toupa'n hon piaksakna ding in thumpih ni.
2. Hojai a semtute'n ginglou houlimpilh a neihte un khalam dangtakna a hon neih ua, semtute tungtawn a amaute Jesu khebul a piilut ahih theihna ding un thum ni.
3. Hojai leh Lanka Station pansan a Home Tuition tungtawn a semtute kalsuanna a naupangte'n kumkim bangmah buaina omlou in a na zoukhetheita uhi. Kipahthu gen in, hihbuaitu omlou a lamzangtak a naupangte lak a lai hihna sutzop zel ahih theihna ding in thum ni.

### D. GOALPARA MISSIONS FIELD

KIPAHTHU GENNA LEH THUMNA DINGTE:

1. Semtute'n lam chituamtuam a a sepna mun ua mite houlimpilhna neihte zel uhi. A kallak in semtu innkuante lak ah damlouhna omthei zel mahleh chidam a semtute'n hon sepzom zel theihna ding un thumpih poimoh i sa hi. Tua

ban ah, semtute'n khalam chidamna hoihtak toh Ministry lamzangtak a hon sutzop zel theihna ding un thumpih ni.

2. Semtu innkuan nih omte'n Khasiangthou kepna toh mailam nawt a khamangthangte itna toh hong kalsuan theihna ding un thumpih ni.
3. Toupa'n field a semtute kalsuanna tungtawn a houlimpihsa a omte innkuan apan Khrist hondampa ding a sang a, A khebul zuan ding mi hon piakna ding in thum ni.
4. Field a semtute'n Project tungtawn a damlou khenkhat etkol khak aneihte un damna hon tan ua, a gammite toh kimeltheih sem leh kitanauna kipsem hon neihna ding un thumpih ni.

## **E. KAMRUP DISTRICT, ASSAM**

### **KIPATHU GENNA leh THUMNA DINGTE**

1. Semtute'n nisa leh vuahzu daikai nuai ah Ministry chidam in semzom thei zel uhi. Maban a Ama min thupina ding a manpha leh gahsuahtak a hon sepzom zel theihna ding un thumpih ni.
2. Home Tuition tungtawn a naupangte nu-le-pate toh semtute'n ki meltheihtuahna bawl theita uhi. Kipathu gen ni, Home tuition tungtawn a Ministry gahsua neih ahih theihna ding in thum ni.
3. Chhaygaon a semtute'n Rabha school khat a naupangte lak ah La (song) hilh in kuan theizel ua, hiai tungtawn a nu-le- pate uh toh kichimatna hoihsem hong omna ding in thum ni.
4. Toupa'n A gamna septheihna ding a lam tuamtuan a kong hong honsak zelna ding leh semtute'n leng tha ittak a louma chiat uh hon sepzom zel theihna ding un thum ni.
5. Semtute'n field ah tanchinhoih genna daltu omlou a sunzom thei zel ahihman un kipahhuai i sa hi. Semtute tungtawn a tanchinhoih genkhakpih a om mite'n Pathian hing hon muh theihna ding un thumpih ni.
6. Dhupdhara Station pansan a semtu Evan K Kamkhenthang in kimawlna tungtawn a mite toh kizopna bawlthei zel a, Dhupdhara Women Football club te lak ah kihel thei zel ahihman in kipathu gen ni. Kimawlna tungtawn a mite toh kichimatna hoihtak semtute'n hon neihma ding un thumpih ni. ■



# DORCAS *Corner*

## IBWU KHAWMPI REPORT

Pathian in hun hoih leh manpha hon bawlsak a November -2024 hon musak a kipaithu gen in amin i phat hi.

Tutung in IBWU 15th General Assembly 1-3 October, 2024 sung Chennai YMCA Hall a om toh kisai report kon bawl hi. IBWU heutute'n ei Saptuam akipan in delegate 15 hoh thei ding in hamphatna hon piak dungzui un heutute phasakpihna toh Central Dorcas Sub Committee-te mi 13 banah heutunu Chingbiakmawi leh heutunu Chingkhavung toh mi 15 Dt.27.9.2024 Sintawpni a Lamka a kipankhia in Dt.5.10.2024 in ka hong tungkik uhi. Khawmpi Thupi: 'BUILD EACH OTHER UP' (I Thess.5:11) a hi. Khawmpi hunsung a hunpi zangte:

### Thugentute:

1. Mrs Vernetta Myint Myint San - President, ABWU
2. Rev. Sukanya Baynes Prabhu, Pastor at Madras English Baptist Church in Vepery Seminar hun la te leh a topic uh:
3. Rev. Dr. GM Beatress Manohar, Doctorare in 'Broken Families' – Holistic wellness of Women
4. Mrs Shellwin Lucas, Motivational Speaker – Strengthen Your Leadership
5. Rev. Usha Jabez Pinapali, Asst. Professor in History of Christianity – Encourage and involve more young women in Ministry

Bible Study: Dr. Watimongla Jamir, Editor of Gurukul Journal of Theological Studies Member Body IBWU sung a omte member 22 hi a, local sung a khawmpi hong sim kha teng toh member body 29 vel kipaikhawm a, milip 300 val in khawmpi kizang hi. Mite kipiakzohna leh thugentute thugen akipan in khalam hinkhua a kilamtouh ding leh midangte toh khat leh khat kilamtou ding i hihdan thuhoih tampi zak in om hi. Manpha in thupi petmah



hi. Bible Study a kipan alungkhoih mahmah khat tuh: Luke 5:3 na ah Simon Peter long a Jesu a tuang a, luigei akipan a long neukha tolhlutsak ding in chi hi. Hiai in a gen nop ahih leh Khrist nungzuitu i hihna ah midangte toh chituam a Pathian min a omtuam ngam ding. Miteng hih bangbang hihlough ding, kampau, nasepte leh omna munte midangte toh hinkhua kituam zek a om ding, Pathian mel i gamtat khohei bangkim a alatding ahi. Tuabang a i om theihna ding in ei mah leh eimah i kivelchet gige ding ahi.

Khawmpi hunsung in Seminar hun thumvei kinei hi. Business Meeting khatvei om a, hiai hun in IBWU Executive member leh OB te Search Committee in a guansate uh nominate ua, Meeting na ah memberte'n pomna kinei hi. IBWU Executive member 2025-2029 sung vaipo thak dingte:

#### **OFFICE BEARERS:**

1. President: Dr. Zoramthangi, Mizoram Baptist Women's Fellowship (MBWF)
2. Vice President: Mrs. Sampurna Pulla, Tamin Nadu United Telugu Baptist Women's fellowship (TUTBWF)
3. Secretary: Mrs Ruth Anand, Bangalore Baptist Women's Union (BBWU)
4. Treasurer: Mrs Bonjera A Sangma, Garo Baptist Convention Women's Department (GBCWD)

#### **MEMBERS:**

1. Mrs Nemngaihmani: Evangelical Baptist Convention (Dorcas) Manipur
2. Rev. Tsipidongla Sangtam: Manipur Baptist Convention Women's Department
3. Mrs Janyce J Sebu: Karbi Anglong Baptist Convention Women's Department
4. Mrs Sudha Karuna Chilak: Convention of Baptist Churches in Maharashtra
5. Rev. Manda Aruna Joseph: Telengana Baptist Women's Union
6. Mrs Nirmala Kumari: Vishkha Baptist Women's Union
7. Mrs Ziakhampuii Darlong: Tripura Baptist Women's Society

8. Mrs Vasantha Kumari: Telugu Baptist Women's Convention
9. Mrs KatoliV Sumi: Nagaland Baptist Church Council Women's Department

Ex-Officio member- Mrs Mayuri Moses, outgoing President, Convention of Baptist Churches in Maharashtra. IBWU Khawmpi zatna ding toh kisai a thumna a honna delhzuite tengteng kiang ah kipahthu k'on gen hi. Tuaban ah khawmpi hohna ding toh kisai a hamphatna hon pia heutate'n sum leh pai a poimoh bangbang hon piak ziak un a kiang uah Pathian min in kipahthu ka gen hi. Lampi haksa, buannawi lak, vuahzu daikai nuai ah lamzangtak in khawmpi hoh a kalsuante Pathian kepbitha toh chidam in nuamsa leh kipaktak in inlum tungthei chiat a hon pitu Pathian kiang ah kipahthu gen in thupina tengteng AMAH kia ka pia hi. ■




## Mu & treble clef ic Corner

Pathian leh A Saptuamte masawanna ding a tungging leh la tungtawn a naktak a panla a, i omna chiat a Toupa ading a theihphatawp a kizang saptuam mite haitan dong hon makaih a honpi i hondampa Jesu Khrist min in itna Chibai!

Hun sawtkuamtak a kipan i na buaipih touh Paite kampau zangte'n thumal kibang a Labu neikhawm ding toh kisai denomination tuamtuate lemsakpihna toh Pathian leh heutate

makaihna in Joint Music Committee: Central Music Sub-Committee EBC leh Music Upliftment Committee PCI (R) in a sun a zan chih omlou in theihtawpsuah a Toupa minthupina ding a pan honla in, i lunggulh leh i na ngaklah mahmah Labu thak: ***“Biakna Labupi***



**& Pathian Ngaihla” (Sol-Fa leh Word Edition)** honkhiak leh latkhiaktheih leh melmuh theih a hong om kipahhuai i sa a Toupa min i phat hi. Biakna Labupi kichi Biakna muna kisa deuh laa-te ahi a, Pathian Ngaihla kichi lenkhawmna deuhthe ahi. Hiai Labu sung ah la number 575 om a lakaih kibang A & B omte toh la 598-om a, huaiban ah, Pathian Ngaihla ah la 410 om hi. Biakna Labupi leh Pathian Ngaihla kigawmkhawm bunih in bawl in om a, Khat pen Tonic Solfa toh kithuah, khat pen Athu vuak ahi. Toupa’n amite i in hon kem a, haitan dinmun hontunpih thupi i sa a kipathu i gen thakthak ahi. Labu toh kisai Convention Book House ah anuai a bang in leitheih ding in om hi.

- Biakna Labupi & Pathian Ngaihla (Tonic Solfa) Rs. 400/-
- Biakna Labupi & Pathian Ngaihla (Athu vuak) Rs. 350/-

Hiai Paite pau a Biakna Labupi leh Pathian Ngaihla sung a om lathute zang in Toupa’n a mite hon houpihthak henla, kikhekna, ki-itna, kingaihdamna & kipumkhatna hontun mahmah leh chih i thumna ahi. Biakna mun a labu i neihte saktam louh, ngaihnat louhna in music leh la toh kisai ah kiakniamna thupitak hon tun adiam i chi a, huaiban ah, khalam tuipailou a hon bahsak mahmah hi inleng theih in om hi. Solfa toh kithuah i neih labute ngaina a, satam in, sintam lehang tuasang in music leh la toh kisai ah ikhangtou ding a, Toupa toh kinaihzwawksemna hontun ding in lametna lianpi i nei hi. Tuabang saptuam hingtak hih ding, music leh la a khangtou mite hih ding i ut mahmah a i thumna leng ahi.

Toupa’n Amite Amah phatna la leh music a khangtou a hing dipdip ding in hon makaih in hon ompih chiat hen aw. ■

---

## Thu Tuamtuam

### KIPATHU GENNA:

Kou EBCC BDC Songtal in hongtung ding December 18, 2024 a Dorka Pawl diamond Jubilee lopna ding a sumzonna a PANPIHNA ANKUANG, October 1 2024, in EBCC PETHUEL a ka sai hun ua, hon awlmoh leh deihsakna lianpi toh annkuang hong um sak saptuam pawl tuamtuamte leh mimal chihte tung ah kipak lua ka hih man un hiai i Kristian thukizakna tungtawn in kipathu Pathian min in ka hon gen uhi. Hiai

a na senna tengteng uh Toupa'n a leh tampi in hon vualzawl zel henla, tua bang a midangte tung a kalsuan theijel ding in hon makaih jel hen chih ka deihsakna uh leh ka thumna uh ahi.

**- Nu Ngaigouman, President, BDC Songtal, EBCC**

---

Mr. T Thangsonlun s/o T Nengkhozam in Assam Rifle a sepna muthak in Toupa vualzawl na ziak a amuh ahih phawk in, a khaloh lak masak pen apoimawhna bangbang a zat ding in TBUC, EBCC Mualnuam ah hon pia hi. Hiai bang thilpiak ziak in kipaklua ka hihman un ka kipahna uh KTZ ah ka hon taklang uhi. Toupan a sepna ah makaih in vualzawl zel hen chih ka deihsak uhi.

**- Upa L Songkhogin, Secretary, TBUC EBCC Mualnuam**

---

Mr H Muangoulia s/o H Nengkhanlal Kanaan in a sepna Assam Rifle ah a khaloh lak masakpen Pathian gam nasepna ding in EBCC Kanaan Saptuam phungvuhna ding in TBUC, EBCC Mualnuam ah hon pia hi. Hiai bang thilpiak ziak in kipaklua ka hihman un ka kipahna uh KTZ ah ka hon taklang uhi. Toupan a sepna ah makaih in vualzawl zel hen chih ka deihsak uhi.

**- Upa T Dongkhanthang, Secretary, TBUC EBCC Kanaan**

---

Mr. Remmuanthang s/o Upa S Kamkhozam, EBCC Jordan in Assam Rifles ah sepna mu a, Pathian kiang a kipahtu genna in Printer Epson L6460, EBCC Jordan vanzat ding in hon pekhia hi. Kipaklua ka hihman un ka kipahna uh KTZ ah ka hon taklang uhi. Pathian in a maban lamzangtak in kalsuanpih leh chih ka deihsakna uh leh ka thumna uh ahi.

**- Upa Th. Gin Lianmang, Secretary, TBUC EBCC Jordan**

---

Mr. K Vunghthianmuan s/o K Zonunsang V Munhoih a om in Bank P.O (Bank of Baroda) a sepna a muh Toupa vualzawl na ziak a amuh ahih phawk in, a khaloh lak masak pen apoimawhna bangbang a zat ding in TBUC, EBCC V Munhoih ah honpia hi. Hiai bang thilpiak ziak in kipaklua ka hihman un ka kipahna uh KTZ ah ka hon taklang uhi. Asepna Nekzonna Dohkan Pulpit Nasepna a zang thei gige ding in Toupan makaih in vualzawl zel hen chih ka deihsak uhi.

**- Upa V Tualkhansong, Secretary, TBUC EBCC V. Munhoih**

---

Mr Suanminthang Shoute s/o S Thangsanglian in Assam Rifles ah sepna mu in, akhaloh lak masakpen Pathian gam nasepna leh Pathian kiang a kipahtu genna in a omna saptuam EBCC Peniel TBUC ah hon pia hi. Hiai bang thilpiak ziak in kipaklua ka hihman un ka kipahna uh KTZ ah ka hon taklang uhi. Toupan a sepna ah makaih in vualzawl zel hen chih ka deihsak uhi.

**- Upa H Pausonmung, Secretary TBUC, EBCC Peniel ■**



# EBC Innsung Thu

## **EBC DHEMAJI MISSIONS FIELD A PAPI GOSPEL CAMP REPORT:**

EBC Dhemaji Mission Field in Gospel Camping masapen hi ding in Nisim 3-6, September 2024 sung manpha leh lohchingtak in kana zang uhi. Hiai Camp a Papi 32 hongtel thei ua kipahhuai kisa mahmah hi. Camp tungtawn a Pathian houpihna tang a Jesu Lal leh hondampa dia sang thei bang, Khristian hihnung a leng ana bah gawpta (nungtolh) hunkhop Pathian maiah hong kilan thak thei uh. Khristian hilou Mr Bengal Doley kichi leng hongtel a, thugen angaihkhiaik tungtawn in Jesu a Lal leh hondampa dia sang in gingtu hong suak a Nisim 8th September 2024 in Baptisma kipe ngal thei hi. Hiai Camp toh kisa i a sum le pai a huhna EBCC Itanagar in Rs. 20,000/ hon pia ua, mimal ah Mrs Happy Pegu of Garparah in leng Rs. 500/- hon pia a amaute tungah kipahthu i gen hi.

Hiai Camp lohchinna ding a Thumtute thumpihna, sum leh pai a kithuahpihna leh Pathian kha siangthou pina kia ahih chih thei kawm in noute ziaik in Pathian thupina i pia hi.

**- REV T PAUNUNSANG, Field Superintendent, EBC Dhemaji Mission Field**

## **PASAL HOTDAMNA LEH NUMEI LEHLANG HOTDAMNA:**

EBCC Khajang in February 20-25 sung Pasal Hotdamna Camp ka nei ua, huai hun ah Evan. T. Damkhothang thugenpi a pang in, Sawltak Lianhmingthang, Sawltak Vungkhothang, Samuel Paukhanmang leh Elson Thanglunmangte laapitu leh counsellor in kizang uhi. Pasal bangzah hiamten suahtakna hon mu in, tunitan in Khrist nungzui muanhuai hitouden lai uhi. Banah, 05-08 September 2024 sung in Numei Lehlang Hotdamna Camp kinei a, hiai hun ah Evan. Upa Lianding Guite thugenpi in pang a, numei bangzah hiam in kimuhthakna leh suahtakna nei uhi. Hiai programme te kou vuak a semsua h zoulou ka hihman un. Hiaite sepsua h theihna dia thumna tampi toh hon panpih, tha-le-zung leh panpihna honpia Saptuam mipite leh EBC Headquarter tung ah kipahthu hiai KTZ tungtawn in ka hon gen uhi. Pathian in thupina tengteng tangta hen!

**- Pastor L. Siamlalmuan, Camp Director, Khajang Area Pastor**

## **BIAKIN THAK HONNA LEH LATNA:**

Kou EBCC Enpum, Singngat Division in Biakin bawltak ding lunggulh leh deih mahmah in ka omlai ua, kou a lah hizou mahmah lou ding ka hih chiang un Dorcas Hall a heutute kiang ah kitai hi. Pathian leh heutute deihsakna in tha leh zung, sum leh pai khat mah leng senglou in Biakin hoitak, nuamtak leh kilawmtak bawlzoh in om a saptuam mipi te ka kipak petmah ka hihman un KTZ ah ka hon taklang uhi. Lamzoh leh luahtheih ding ahihtoh kiton in September 25, 2024 in honna leh latna Director of Ministries Rev Thawndoulian in hong neihsak hi. Hiai hun in EBC Singngat Division apan DS leh a teamte, DEC memberte, kho kim leh kiang a Saptuam mipi hongpai khawmte programme lohching sak mahmah uhi. Thupina tengteng i Pathian kia in tang hen.

**- Upa Khamzachin, Secretary, TBUC, EBCC Enpum ■**



# Ordain Sunna

1. Min: **UPA KAIKHENMUNG TOMBING**
  2. Pianni: September 04, 1969
  3. Pianthak Hun: August 14, 1987
  4. Baptisma tanni: August 16, 1987
  5. Pa Min: Phamsa T. Ginkhotuan
  6. Nu Min: Phamsa Thangkhoching
  7. Zi min: Jamkhanmoi
  8. Kitenni: June 22, 1996
  9. Gil a gah goutan neihzah: 3 Pasal: 1 Numei: 2
  10. Tulel a omna Saptuam: EBCC Kohima
  11. Tulel a kizatna: Chairman TBUC, EBCC Kohima
  12. Ordain Kum: Dec. 09, 2018 Ordain Petu: Rev S Vung Minthang
  13. Pahtakna lai san kum: Sang nailou
  14. Toupa kiang a tawldam ni: October 01, 2024, Vui ni: Oct. 02, 2024
  15. Vuitu Pastor & Saptuam: Pastor T Pauzarual, Bialtu Pastor
  16. Sepna toh kisai: September 20, 1989, in Office of the Principal Accountant General (A&E), Nagaland, Kohima, ah Clerk/Typist a-na join hi. November 20, 1992, in Accountant promotion mu a, Senior Accountant January 05, 1996, in ana mu hi.
  18. Saptuam a kizatnate: April 04, 1999, in EBCC Kohima dinkhiak in om a, tua hun in Interim Local Committee ah Treasurer mohpuakna len hi. TBUC sung ah dinmun leh mohpuakna poimohtak alen hi; Member (2002-04), Treasurer (2005-07), Secretary (2008-10), Treasurer (2011-13), Treasurer (2014-16), Secretary (2017-19), Chairman (2020-24).  
September 26, 2024, office kaitawp dak 6:00 PM vel in inn ah akhe leh akhut zoi leh nop salou in Oking Hospital (Kohima) puaklut in om hi. Hospital ah test chi tuamtuum (sisan, ultrasound CT scan, chihte) bawl in om hi. Nitak hong sawt haihiai toh atheihtheihna (sense) leng hong chau deuhdeuh a, ICU ah koihlut in om hi. September 29, 2024, in Faith Hospital and Institute of Medical Sciences, Dimapur, ah ki-enkol ding in puaklut in om hi. October 01, 2024, nitak dak 9:00 PM vel in amuanpa kiang ah honna khawl tawldam santa hi. EBCC Kohima intekna nuai ah October 02, 2024, in sunna leh vuina programme zat in om hi.
- Toupa Khasiangthou in a nutsiat a inkuan leh Saptuamte khamuan in makaih zelta hen.



1. Min: **UPA S. NANGKHANSUT**

2. Pianni: 23rd. April,1977

3. Pianna Khua: TUIMUI

4. Pianthak Hun:

5. Baptisma tanni: June 4, 1997

Baptistu: Pastor L Ngaithang

6. Pa Min: (L) Kamzagin

7. Nu Min: (L) Zelkhawnuam

8. Zi min: Vungkhanching

9. Kitenni: Nov. 09, 2010

Kiteng saktu: Pastor G Khankham

10. Gil a gah goutan neihzah: 5 Pasal: 5

11. Tulel a omna Saptuam: EBCC Vaikhawtlang

12. Tulel a kizatna: Chairman TBUC, EBCCVaikhawtlang

13. Ordain Kum: December 02, 2012

Ordain Petu: Rev L Kham Kho Lun

14. Pahtakna lai san kum: Sang nailou

15. Toupa kiang a tawldam ni: ~~September~~ **SBC** September 24, 2024

Vui ni: September 24, 2024

16. Vuitu Pastor & Saptuam: Pastor B Paubiaksang, Bialtu Pastor


17. Natna: Stroke


18. A tanchin: Amah pianfel tak ahia, himahleh dam theilolou hi. Himahleh natsiat luat nei lou in, khatvei a pichin nung in a inn bawl inntung apat kia in a kawng leh khel tat in kitat selolou in dam kik nawn vanglak hi. Mi kizen leh fel mah mah, zuanzang mahmah ahia, mi kisinsiam tak Saptuam makaihna a makaih siamtak ahia, Pathian leh saptuamte it a mohpuakna ngaipoimoh mahmah leh mi kipezo tak mi ahia, a neu alian kithuahpih thei, kingainiam, sep-le-bawl a mi kuhkal mahmah ahi. Mizoram Division a DEC member a pang lel ahi. Mizoram Division BYF khawmpi zang khin in nitak lam Dak 1 vel a hong tung in, nitak leng kikhawm peihlou a lum in zinglam Dak 02:30 vel a pat hong buai in sawt thuaklou in zinglam 03:30 in leitung hon nutsiat san hi.

Toupa Khasiangthou in a nutsiat a inkuan leh Saptuamte khamuan in makaih zelta hen.



1. Min: **UPA G SONGCHINKHUP**
2. Pianni: September 09, 1945
3. Pianna Khua: Phaipheng (Bualtang)
4. Pianthak Hun: December 24, 1992
5. Baptisma tanni: 1955 (Neu lai a tang)
6. Pa Min: (L) Ginkham
7. Nu Min: (L) Vungkhoning
8. Zi min: Nu Neitinhoih
9. Kitenni: June 15, 1962
10. Gil a gah goutan neihzah: 5
11. Tu melmuh zah: 14
12. Tusawn melmuh zah: 4
13. Tulel a omna Saptuam: EBCC Kanaan
14. Tulel a kizatna: TBUC Member
15. Ordain Kum: December 12, 1988
16. Pahtakna lai san kum: December 13, 2015
17. Toupa kiang a tawldam ni: October 04, 2024



Vui ni: October 05, 2024 

18. Vuitu Pastor & Saptuam: Pastor M Thangkhenmung, EBCC Kanaan

19. A tanchin gelbeh nop: Mi pautamlou, lawmpolhte toh kisel leh kina ngeilou, amah hihtheihna Chiang a diktatna hinkhua nei, mi thagam nei, singtang pamawl, siamsinna a pawl 2 Chiang zou, inkuan kepna ah theihtawp a kisuk mi, Pathian biakna limsak, saptuam ah kizattheihna Chiangchiang ah heutu leh mohpuakna ngaipoimoh mahmah mi ahi. Bible sim a poimoh ngaih a, phatna lasak amah khomkhom a in a lunglut hi.

20. Kawngna neimi ahi a, Doctor leh mi zuttheite a vangkim in naih den hi. 2010 apan in nungram a kipan soiselna tamsem hon nei hi. Hernia Surgery nihvei kibawl nung in zunthak dan ngeina tungthei lou in buaipih den hi. A kawngnat ziaik in MRI leh CT Scan la in doctor in operation teitei ngai chimah leh ama taksa hatlou banah, nihvei bang operation zou ahihleh lauhna leh kimuanlahna ziaik in operation lou in kikep theih dandan in kikem den hi. August 14 in hong chaudeuh ahihman in test tuamtuum hih in hospital ah lut hi. Hospital ah ni 10 bang om nung in hoih deuh chin inlam ah ki-enkol ding in om mah leh anatnate hong uang deuhdeuh in amuan leh a nna asepa Toupa kiang tawldam ding in it leh ngaih tampite nusia in October ni 4, 2024 in tawldamta hi.

Toupa Khasiangthou in a nutsiat a inkuan leh Saptuamte khamuan in makaih zelta hen. ■





## *Kipahthu Genna leh* THUMNA DINGTE

NOVEMBER 2024

**1 SINTAWPNI:** Khathak hon musak i biak Pathian kiang kipahthu gen ni. November 2-4 sung EBCC G Mualkawi in Nungzuihna Chialpi neiding a Rev K Kamchinkhup, Director of Missions thugenpi in pangding. Chialpi lohching leh gahsuh ahihna ding in thumpih ni.

**2 KIGINNI:** Tuni in EBCC Elim Veng in Nupa Seminar hun zang ding ua Resources person ding Rev Paukhanmang Guite hi ding, kisinsakna manpha leh lohching ahihna ding in thumpih ni. Dorka Khawmpi lian 43na manpha leh lohchingtak a hon zousak i biak Pathian kiang kipahthu gen ni. November kha sung in Saptuam School ten Sport neichiat ding uh. Lamzangtak a honzoh theihna ding in thumna ah phawk ni.

**3 NIPINI:** November 4-8 sung EBCC Hiangtam Lamka in Solfa, Choral conducting kisinsakna neiding ua, Thangbiaklal Valte, Music promoter in sinsak ding, thumna ah phawk ni.

**4 SEPPATNI:** November 5-6 sung ZCF Chennai in Crusade neiding a, Evan Lianding Guite thugenpi in pangding, program

lohching leh manphatak a zat ahihna ding in thumna ah phawk ni.

**5 SEPNAWNNI:** November 5-9 sung EBCC Dorcas veng in BYF Camp ORC ah neiding a Rev K Kamchinkhup, Director of Missions leh Evan T Damkhotang in Pathian thutak gending uh, Camp lohching leh gahsuh ahihna ding in thumna ah phawk ni.

**6 NILAINI:** November 7-9 sung EBCC Moria in Papi kum 50 Quailam Camp neidinga, Rev K Kamchinkhup, DMns thugenpi in pangding, thumna ah phawk ni.

**7 NINGANI:** IBWU General Assembly 15na, Chennai YMCA Hall ah lohchingtak in neihzoh hita. EBC akipan Central Dorcas Subcommittee vakihel thei uh, kipahthu gen ni. Buaina tampite lak ah Bethel Home Mission, Moreh nasepna paihoih theizel, kipahthu gen in, home enkaitu Evan Pauven Ngaihte leh a naupangte a ding in Pathian makaihna ngen in thumpih ni.

**8 SINTAWPNI:** Lametnamun (LRRC) nasepna Toupa huhna toh paihoih theizel, kipahthu gen in, semtute leh kep a om (inmates) mi 50 vel om gige te a ding in Pathian ompihna leh makaihna ngen in thumpih ni.

**9 KIGINNI:** Tuni leh zingchiang in EBCC G Mualkawi ah Upa Bial Khawmpi zang ding ua huai a Evan N Thangsuanpau thugenpi in pang ding Pathian Khasiangthou kithuahpih ngen in thumpih ni. Hiai hunsung mah in EBCC Chennai in Chialpi neiding a, Evan Lianding Guite thugenpi in pangding, thumna ah phawk ni.

**10 NIPINI:** November 11 in EBCC Chennai in kum 15 chinna leh Pathian kianga kipahtu genna hun zangding a, Evan Lianding Guite in Pathian thutak gen ding. Program lohchingtak a zat ahihna ding in thumpih ni.

**11 SEPPATNI:** November 11-15 sung EBCC Lungthul-Dein solfa sinna neiding a, Thangbiaklal Valte, Music promoter EBC in sinsak ding a, a kihel ding mite leh sinsaktu ding Pathian om pihna ngen in thumpih ni.

**12 SEPNAWNNI:** November 12-16 sung EBCC Zion in BYF camp ORC ah neiding a, Evan T Damkothang leh Rev Ginmalsawm, Principal, GBC thugenpi hiding uh. Camp lohching ahihna ding in Pathian Kha pawlna ngen in thumpih ni.

**13 NILAINI:** Gamsung vengbit dinga frontline a duty te ziaka kipahtu gen in, Pathian phawk kawm a, naktak a hongpan zomzel theihna ding un thumpih ni.

**14 NINGANI:** November 15-17 sung EBCC Vaalveng in Nungzuihna Chialpi neiding a, Evan Lianding Guite thugenpi in pangding. Khasiangthou pawlna ngen in thumpih ni.

**15 SINTAWPNI:** November 16 in EBCC Central Lamka leh Lailam veng kigawm in Joint NDPN seminar neiding a, Rev K Kamchinkhup, Director of Missions in sinsak ding, manpha leh lohchingtak a zoh ahihna ding in thumpih ni.

**16 KIGINNI:** November 17 in EBC pumpi ah naupang leh piching pawl nipi skul kumtawp ekzam omding, fel leh kizentak a zoh ahihna ding in thumna ah phawk ni.

**17 NIPINI:** Saptuam in Headquarters, divisions leh mission field te a Toupa gam nasepna dia poimoh mahmah gari i neihte, tunitan a hon kepbitsak ziak in Pathian kiang kipahtu gen ni.

**18 SEPPATNI:** Dotproj, puankhuina tungtawn a nasepna paihoih theizel, kipahtu gen in, instructor leh sintuten chihtak suah a pan honlak ua, tunung a sintuten nekmuhna ding khop a hon sinkhiak theihna ding un Pathian makaihna ngen in thumpih ni.

**19 SEPNAWNNI:** November 20-22 sung CBA Central Church, Gochinkhup veng in Hun nanung chialpi neiding a, Evan T Damkothang thugenpi in pangding, thumna ah phawk ni.

**20 NILAINI:** Tuni a kipan in date 24 sungteng EBCC Pethuel in Chialpina nei ding a Evan N Thangsuanpau thugenpi in pang ding chialpina gahsua leh manpha ahahna ding in thumpih ni. Convention Book House nasepna paihoih zel, Pathian kiang a kipahtu gen in, semtute a ding in Pathian pina ngen in thumpih ni.

**21 NINGANI:** November 22-24 sung EBCC Thingkangphai in Hotdamna Chialpi neiding a, Evan Lianding Guite thugenpi in pangding, thumna ah phawk ni.

**22 SINTAWPNI:** November 23-24 sung EBCC Kanaan in Tualsung Missions Khawmpi zangding a, Rev K Kamchinkhup, Director of Missions thugenpi in pangding, thumna ah phawk ni.

**23 KIGINNI:** November 24 in EBC Headquarters saina in Lamka North leh South a Senior pawl te Contemporary Issues toh kisai kisinsakna Gospel Centenary Hall ah omding a, Rev K Kamchinkhup, Director of Missions, Evan T Damkhothang leh Evan Lianding Guite sinsaktu in pangding uh. Thumna ah phawk ni.

**24 NIPINI:** Rev N Khaikhuphang leh inkuante holiday zanga inlam a bangtanhiam hong omnung un, suty bei in, a omna uh Bangkok, Thailand tungkikta uh, kipahtu gen in, maban honsep zomzelna ding uah thumpih ni.

**25 SEPPATNI:** November 26-29 sung EBCC Elimveng in Piching Camp, ORC ah neiding a, Evan Lianding Guite thugenpi hiding. Camp lohching ahahna ding in thumna ah phawk ni.

**26 SEPNAWNNI:** November 26-29 sung MELC Hiangzou in Pasal Camp neiding a, Evan T Damkhothang thugenpi in pangding. Pathian Kha pawlna leh makaihna ngen in thumpih ni.

**27 NILAINI:** EBC Kumsim khawmpi lian 76na December 5-9 sung Gospel Centenary Hall a omding Khawmpi Ulian dingte a ding in Pathian makaihna leh vaihawm siamna ngen in thumpih ni.

**28 NINGANI:** Kumsim Khawmpi lian 76na a thugen ding Rev Dr S Vung Minthang, GS leh Bible Study Pitu ding Rev Ginmalsawm Principal, GBC te a ding in Pathian ompihna leh makaihna ngen in thum ni.

**29 SINTAWPNI:** November 30-December 1 tan daihdng in EBCC Bethany in BCD chialpi neiding a, Evan Lianding Guite thugenpi in pangding, chialpi lohching ahahna ding in thumpih ni.

**30 KIGINNI:** Tukum a November kha bang zangliam theinawn Pathian kiang ah kipahtu gen ni. Kha thak a vualzawlina leh makaihna toh manpha leh lamzangtak a i zattouhna ding in Toupa khut ah kikem sakni. I nam makaite a ding in Pathian ompihna leh makaihna ngen in thum ni. ■

---

---

---

Postal Regd. No. MNP 07 | Regd. No. 22344/70

**BOOK POST**

If undelivered, please return to

The Editor,  
KCHRISTIAN THUKIZAKNA  
P.O. Box-6, Dorcas Hall,  
New Lamka-795006, Manipur, India



**Edited & Published by Rev. Dr. S. Vung Minthang for the Evangelical Baptist Convention**  
*Designed and Printed at Convention Book House, Dorcas Hall Campus, New Lamka - 795006*